

四明談助目錄

第九本南城三

卷十九

竹嶼錄 劉王舒陳唱和詩又謝山十洲志附 新按

西湖樓氏述 族望表附 新按列 正議郁 太師昇 安撫璫

嚴州錫 大學士鑰 編修鏐 教授鉉 屯田淳 邵

武扶 隱君儉 處士德源 孝廉啓諸傳又 宋明登科

錄 古跡義田莊 攻媿齋 白醉閣 仰嵩樓 登封

樓 梅麓諸記并 句餘土音登封樓詩一首

王家墩湯氏錄 近代科貢 鄉長者起鎬并連傳

西湖汪氏述 族望表附 新按採 洪景盧友恭堂記列 助教洙

四明談助 卷十九

少卿思濫 尚書大猷 汀州之林 副使繪世諸傳又

宋登科錄

義莊應氏述 族望表錄 處士本仁傳又 義塾錄 聞志

葺芷應氏述 族望表錄 參政儼傳

沈方伯第錄 布政一中禮部泰濬明經延嗣諭德延嘉諸傳

陸氏掬花園錄 知縣起元傳全謝山意園詩陳公籲竹枝詞

史雪汀竹東居錄 雪汀榮傳 徐廷尉故居附 新按

五岳軒朱氏附 朱氏宗譜族望表錄 同知勳 御史燾 淮

安基昌 休寧陞 博士維塘 道人金芝 隱君獻臣

遺民鈇 隱君洞 文學金鑑連傳附 御史逸事一則

柳堂傳後記一則 柳堂詩六首 僧澹歸三月十九詩

一首 勾餘土音詩一首

張尚書心遠堂 述 嘉靖志 附 新按 又 張氏蕭園 述 敬止錄

謝御史第 附 新按 列 閣學三賓 殉難行人于宣 并 余恭人

孝廉爲憲 公子爲衡 文學于天 太學爲雯諸傳 錄

山東平亂始末 迎降不用事 視師記畧題詞 天賜

園新按 絳雲樓漢書歸謝氏 并 春酒堂漢書記 句餘

土音賦鷗波道人書 毛異人演追魂法 博雅堂書厄

謝恕齋家居逸事

桂芳橋高氏 述 聞志 採 鮎埼亭集 并 族望表 列 少宗伯閱

華文文虎 禮部似孫 大宗伯衡孫 處州衍孫諸傳

附 高氏逸事四則 宋登科錄 醫學派別一則 別業

四明談助 卷十九

目二

南麓 長春書院二記 湖語并注二段 勾餘土音詩

一首 末附 蔣季莊傳

楊冏卿第 附 新按 列 太僕美益 太學承鯤 遺老秉紘

殉難兄弟文琦文琮文瓚文球 又列 烈婦沈氏張氏 文

學式傳諸傳 錄 屠田叔碣石編序 聞志記別業脩園

全謝山脩園詩 屠鳧園辨 陳公籲竹枝詞 謝山四

忠傳後記 錢退山咏楊侍御舉葬詩 句餘土音楊氏

忠烈詩三首

月島 錄 劉王舒陳唱和詩聞隱鱗詩謝山十洲志 附 新按

牢家橋宋氏 附 新按 并 義士魁先 明經商英小傳

鑄治坊邵氏 述 族望表 附 新按 列 提學玉 刑部城 中丞

基 侍郎洪諸傳

趙敷文賃屋 述 月湖丈尺圖

花果圍廟 述 聞志 錄 謝山花果園廟記

信天緣堂 述 聞志 并 族望表 錄 省事老人朱翌 連子 軾傳

信天緣堂自記 句餘土音詩 又朱氏宋儒長文傳

永寧巷費氏 附 新按 縣社壇橋 述 敬止錄

韓家橋 述 寶慶志 建碑橋 述 敬止錄 錄 宋處士恢傳

卷二十

菊花洲 錄 劉王舒陳唱和詩 又 謝山十洲志 附 新按

西湖史氏 述 族望表 錄 贈公簡 八行詔 參政才傳

史越王府 述 聞志 附 新按 錄 太師浩傳 并 傳後跋 忠定貸

四明談助 卷二十

目三

坊錢 登仙霞嶺 德壽宮隆禮 忠定封越王青詞

忠定薦士 答拜鄉曲 洛迦見大士 忠定有功儒學

刪定父子不受爵 友林詩筆 月湖老漁 史氏六老

圖序

方氏第三府 述 結埼亭集

張中丞第 述 聞志并族望表 錄 都御史楷 游擊應麟 副

使昺諸傳 附 副使父子寄答詩二首 副使昺遺事三則

萬季野咏投銀釵詩一首

高麗張氏 述 族望表 附 新按 錄 知縣伯庠 殉雞處士槌

文學汝翼 節母葉氏諸傳 杲堂文鈔雍睦堂記一首

句餘土音詩二首

張方岳第述 聞志附 新按錄 布政淵 同知鳳墀 知縣起

宗傳又附 張吏部文燧傳

柴巷述 聞志 葛榜眼第附 新按

馮制使宅述 聞志并 族望表又 湖語注錄 絜齋集統制湛傳

馮氏得趣樓述 絜齋集 萬金樓述 延祐志并 四休居士詩

豐尚書宅採 月湖丈尺圖附 新按

柴巷徐氏述 族望表採 徐氏宗譜附 新按并 歷代科名 監

軍鳳垣傳又附 遜國徐鳳陽安傳

徐御史第錄 御史之垣并 子孫連傳 尊志堂採 姜湛園文

大歡喜菴述 聞志附 新按 湖東惠井採 敬止錄

陳太史宅述 聞志并 族望表錄 太史束 孝子洪憲 封公

四明談助

卷二十

目四

文奂 翰林錫嘏 大理汝咸 南臬汝登諸傳

西湖林氏述 族望表錄 侍御必達傳

楊指揮衙述 敬止錄明季故冊 又蕭氏採 蕭氏遺像序

史忠宣宅述 嘉靖志錄 資政彌堅 敷文賓之傳并 忠宣尚

郡主 諫兄辭相位事

高麗使館採 鮎埼亭集又 玉照新志并 高麗通使始末 南

渡後倭人互市至大間致亂焚掠事俱述 敬止錄

寶奎廟述 聞志錄 謝山寶奎廟碑記附 廟衙陳孝婦被災事

施氏清風閣述 族望表錄 通判承芳 都督瀚 公子邦焮

諸傳

戴學博舊居錄 泰順訓導淦小傳

維舟埠述 月湖丈尺圖并 湖語注
時亭述 開慶續志 水則述 郡邑志并 湖語末附 新按

四明談助

卷二十

目五

四明談助卷十九

月湖十洲中央之四址錄竟次及東岸三址茲先錄竹嶼月島

竹嶼

劉戶部理竹嶼詩和者王亘 舒亶 陳瓘

翠雲搖曳波心起清影扶疎月際來結實終期丹鳳至虛心聊映小桃開

鳳集龍驤未足才獨驚高節出雲來此君端的吾家舊爭得柴門相向開
欲問葛陂安在哉端疑波底化龍來子猷此興君知否小徑何妨卷竹開

四明談助 卷十九

一

霜枝迥出紅塵外只有鷓鴣傍水來別岸若尋栖隱處軒窗須爲此君開

謝山西湖十洲志云由松島絕湖而東爲竹嶼劉理詩曰清影扶疎月際來以其接月島也晝錦橋當其南牢家橋當其北

牢家橋橫河一道今已塞當七牧廟旁結埼亭集

月湖十洲始由大坂田過東爲烟嶼由烟嶼絕湖而東爲松島茲再由松島絕湖而東爲竹嶼其分水南從南城下入日湖北由湖心東橋憧憧東橋從碧沚庵左入平橋河竹嶼之上爲樓氏舊宅爲義田茫爲仰嵩樓登封樓梅麓爲汪氏友恭堂爲應氏義塾爲桂芳橋高氏爲長春書院

在明爲徐廷尉故居爲沈方伯第爲張尙書第爲謝御史第爲五岳軒朱氏爲楊太僕第爲張氏蕭園爲陸氏拘花園等蹟

西湖樓氏

樓正議講舍楚公錦照堂俱在松島已見前其故廬則在竹嶼宋以後亦有遷于光溪洞橋者

甬上族望表樓氏本自剡源來居城南正議先生又遷西湖太師楚公而後始大然楚公塞湖鄉里非之其得列于望者正議爲慶歷五先生之一導源儒林第一揚州安撫使璫之義田第二知嚴州錫之純孝第三攻媿先生宣獻公以大儒振之第四梅麓先生之文章第五郎中之克守家學第六隱

四明談助

卷十九

二

君儉之麻學第七共七望

正議樓先生郁

字子文自奉化徙鄞卜居城南志操高厲學以窮理爲先屢空自樂爲鄉人所尊慶歷中詔郡縣立學先生掌教前後三十餘年一時英俊皆在門牆最知名者豐稷袁穀羅適也登皇祐五年進士以大理評事終于家贈正議大夫著正議集三十卷子孫皆踵世科詳延祐志史相贊曰翁臨西蜀一化南閩公以是教作成吾鄞逮今士子傳學彬彬收

功貽厥世有顯人

四明文獻錄

太師樓楚公昇

字試可正議之孫進士常之子也元豐八年登進士政和

未知隨州入辭請于明州置高麗一司剗百舟應使者之須以遵元豐舊制州有廣德湖墾而爲田收其租可以給用徽宗納其說改知明州治湖田七百二十頃歲得穀三萬六千郡資湖水灌溉爲利甚廣自是苦旱鄉人怨之在郡五年進徽猷閣直學士知平江府卒

宋史

樓安撫璫

字壽玉一字國器楚公之子宣獻公伯父也紹興間爲於潛令篤意民事爲耕織二圖耕自浸種以至入倉凡二十一事織自浴蠶以至剪帛凡二十四事事爲之圖系以五言詩各一章章八句雖四方習俗間有不同其大畧不外乎此尋又有近臣之薦賜對之日遂以進呈卽蒙嘉獎宣

四明談助

卷十九

三

示後宮書姓名屏間歷仕閩廣舶使攝長沙帥維揚持麾節十有餘載所至多著聲績晚而退閒斥俸餘以爲義莊宗黨被賜焉官至朝議大夫

語採樓攻媿集

樓安撫宅在竹嶼坐

西瀕湖宅後正對隔湖樓三學士宅月湖丈尺圖云樓三學士宅取樓安撫宅四十九丈六尺南城下至樓安撫宅後六丈三尺自此取南水門一百四十七丈六尺又有樓參政府在日湖錦照橋之西岸

樓巖州錫

字予善安撫從子宣獻之兄以才敏稱調秀州司戶參軍鎮江有軍校告于朝自言久掌軍用軍將貸錢以萬計知已將訴之欲殺以滅口故亟上變廟堂駭其說置獄俾錫

治其事錫請械軍校以隨途中詰之軍校果誣將也不三日即罷詔獄孝宗嘉歎遷大理丞連治數大獄皆平允後知嚴州卒延祐志湖語云館閣元公師表乾淳龐然名德宣獻最尊哲彙亦賢聽訟有聞哀毀損折孝更純也

大學士樓宣獻公鑰

字大防大理評事郁之五世孫也隆興初進士中教官科調溫州教授陞宗正丞出知溫州光宗嗣位召對擢起居郎兼中書舍人公立螭頭登右掖繳奏無所回避禁中或有私請上曰樓舍人朕亦憚之不如且已會慶節上壽扈從班集乘輿未出已而玉牒聖政會要書成將進重華又屢更日公進言于上上感悟進書成禮試中書舍人兼直

學士院光宗病不能持喪傳位皇太子公草詔有曰雖喪紀自行于宮中然禮文難示于天下人服其婉寧宗既受禪遷給事中時韓侂胄用事吏部侍郎彭龜年外除公遂告老家居凡十三年杜門著書侂胄與客言樓大防善士何無一札入都門且使諭意客至公家述其語公默然子弟相顧具紙筆公從度中取顏氏家訓言士大夫晚歲名節事置紙上卽起入內客疑公援某事取視之俱大愧撤去紙墨公須臾就坐客不敢言公亦不復問舉酒言笑如平時其從容持正若此侂胄誅起爲翰林學士時年過七十精敏絕人歷遷同知樞密院參知政事位兩府者五年累疏求去除資政殿大學士歸卒于家贈少師諡宣獻公

學問精博初罷官里居聚書東樓踰萬卷皆手校讐稱善
本性尤樂易扁所居曰攻媿齋自稱攻媿主人有文集一
百二十卷行世諸政績詳甬上耆舊傳

樓編修鏐

號景山楚公之孫攻媿先生從兄也與弟教授少虛同登
紹興三十年進士少有場屋聲以詞章聞于時歷樞密院
編修守江陰以治最聞自九江移武昌以疾奉祠而卒公
居家孝謹臨政明恕讀書博而能精屬文麗而有體嘗以
爲能定未易故自號其齋曰求定云語採攻媿集

樓教授鉉

字少虛編修鏐之弟未冠能屬文紹興二十九年解試爲

四明談助

卷十九

五

第七名明年省試爲第六名三場俱高甥壻盛箕號能文
自婺來明作四明八詠頗工衆方環坐讀了少虛久與之
厚字呼曰次龍沈約文體卑弱可憎君又效之耶盛愧悔
藏其稿不出一日在鄭先生剛中席下數十人忽私謂弟
鑰曰吾默觀同舍中惟楊聖可與吾弟爲佳問之則曰惟
汝二人清而有福問兄何如曰吾雖清如無福何

見攻媿集

樓屯田淳

字質夫宣獻公之子官至屯田郎中文行皆能世其家

慶寶

志湖語所謂屯田學問克肖乃翁中原師友共仰大宗也

樓邵武扶

字叔茂宣獻公之從孫知泰州及邵武軍能詩

延祐志

樓隱君慘

隱君為宣獻之族孫精麻法言宋司天氣朔盈虛當改章
法不可用人未之信後授時歷頒言始驗館於袁賓州浚
家四十年日布筭疑多財者貧老卒清容集湖語云測天量
日希蹤洛下長貧始慘布筭不暇宋注洛下閎漢時人精于歷法

樓處士德源

字伯淵念祖宗履世仕宋受國厚恩遂抱道高隱開義塾

啓迪後進為鄉人所稱曹志

樓孝廉啓

字立中太師越國公昇之後至君之祖始以醫生徙京師
君少好剛負氣長乃務為恭遜樂易之行學于鄒博士允

四明談助

卷十九

隆文益進天順己卯試京闈中選明年會試禮部在乙榜
例授教職不就居三載復會試是為天順七年二月戊辰
及夕試院火作起趨而避鬱攸從之試士死者百有十六

人樓君與焉楊文懿公集

樓氏自宋迄明登科總錄列後已有傳者不列

常郁子治平

光郁子熙寧

弁常子元符

鏞孫紹熙

汶丙辰曾孫慶元

淮辛未曾孫嘉定

采汶從子嘉定

鑛郁五世孫嘉

洩丁亥進士

梓壬辰孫紹定

涪錄子

濂鑰從子

瀚昇曾孫

澗錄子紹定壬辰

漼汶弟端平

稅昇元孫

棹俱端平乙未

條昇五世孫嘉

梓鑰從孫

侃昇五世孫

柎俱嘉熙戊戌

冽鑰從子淳祐丁未進士

棗昇元孫

澎鑰從子

樟

枝俱淳祐丁未

極開慶己未進士

偉明天順己卯舉人

東成化己未進士主事

得月崇禎庚午舉人知縣

光溪洞橋樓氏亦畫錦坊之分支樓偉樓東居光溪見沈

嘉則光溪詩註以上歷叙科目以下詳樓氏古蹟

樓氏義田莊

紹興間淮東安撫樓璫置有廬江况遠記至正續志今坊南瀕湖

有義莊廟蓋即其司莊之神初安撫置田五百畝建屋以為

義莊凡宗黨貧者廩給有差久而恐壞嘉定間宣獻公參大

政援范文正公例申請敢一違越則官有恒刑尚書檄給如

四明談助 卷十九

請迨元大德間子孫蕩析以售皇慶間族長陳于官不肖伏

辜諸受售富民視元直無有願與樓氏中分田租之半以當

之歷四年始全復焉元統間郡推官况遠為之記聞志

攻媿齋

在縣南畫錦坊樓宣獻公所居嘉靖志嘗曰人患不知其過知

之而不能改是無勇也自號為攻媿主人銘其座右曰逆境

進德順境誤人絜齋集行狀

白醉閣

開元時高太素隱商山起六逍遙館各製一銘其三為冬日

初出銘曰折膠墮指夢想負背金羅騰空映檐白醉見清異

錄樓攻媿嘗取白醉二字以名閣輟耕錄攻媿先生書桃符云

門前莫約頻來客坐上同觀未見書困學紀聞

仰嵩樓

樓宣獻藏書既富欲別貯之執政之次年東樓始成聚古今羣書其上而累奇石于前又取楚公登封令時所藏嵩嶽圖石刻刻屏其下仍以仰嵩舊名名之集 絜齋

登封樓

樓楚公爲令東封得嵩山石以歸其孫宣獻公築樓扁曰登封而貯石于其上清容居士集

句餘土音賦樓宣獻公登封閣

我聞墨莊宰登封徧賦嵩山三十有六峯區區拳石亦聊爾漫勞高閣庋置東樓東紫翠亭前梅萬樹長共獨山兀立青

四明談助

卷十九

八

葱葱墨莊有石刻嵩山三十六峯賦予自中州得之紫翠亭墨莊所築東樓則宣獻書庫梅麓乃宣獻從孫杖所築

誰知此石繫掌故當年幾許北望勞深衷小朝廷已懷樂國湖山列嶂翠碧紛千重聽彼南山白石爛不振臨安宮裡曠且聳汴京艮嶽夜雨泣未若斯閣偃臥小玲瓏可憐攻媿翁雙眸老淚長矇矓我來弔陳迹閣耶石耶一望歸碧空

梅麓

攻媿族孫杖築梅麓湖東湖語今梅園廟前河漕甚曲當是

梅麓遺址

謝山湖語登封閣下嵩洛可撫攻媿東樓拂雲高戶蕭疎梅麓在湖之澚稍折而北友恭有堂萼華接葉中有二汪時則野處之記雄文皇皇汪少師思溫兄弟所居洪野處邁爲記

王家墩湯氏

竹嶼樓氏故基今爲湯氏之居與菱池頭湯同族

湯炳 康熙丙申歲貢選授訓導

湯以銑 雍正乙卯舉人會稽教諭子之盤名諸生現今六十餘應試不衰

湯桓 乾隆間廩貢捐授副指揮著有雪隈文稿季弟家彥號七橋工畫菊山舟梁太史題識有石刻行世父梅麓翁以孝友稱傳見後

梅麓湯君起鎬字豐亭號梅麓出繼于世父以堂爲後至情眞摯于兩世宗支持養葬祭皆身任之持家儉素自奉甚薄而戚黨故舊間復好施不倦家值中落遂棄舉子業入

四明談助

卷十九

九

都以父在家歲奉甘旨之費無虛月其後旋里先爲兄姊營婚嫁乃自受室踰時復北上留金付其婦治供饋一日忽心動治裝亟返甫抵家而父已卒號踊幾絕由是目漸昏眊以至于失明晚歲以兄不善治生姊適人者亦寡乃同居合食上世墳塋及丙舍捐貲修葺復手訂歷代祀籍旣病目口授其子命續書以垂永久外舅張浩軒無後贈遺無闕身後爲之營葬他善行不能盡述享年七十有五

蔣樗菴撰傳

西湖汪氏

汪隱君洙晚年築室西山以講學故汪氏舊居在西山之潘壘至大府少卿思溫始建第于王家墩宋嘉定間月湖丈尺

圖云汪尚書宅取竹洲東岸九丈九尺宅前有符桂坊
甬上族望表慶歷五先生之外惟汪隱君洙亦有慶歷汪先
生之目至顯謨思溫而貴莊靖公大猷而大汀州彬不附秋
壑亦賢矣凡四望今其子孫居雷峯尙盛見後表

汪氏友恭堂

在月湖之上宋大府少卿汪思溫與弟思齊所居

聞志

友恭堂記

鄱陽洪邁撰

友恭堂者鄱江汪氏所立也汪望于歛宗家幾十室而九至
于處鄞則由正奉公始大公用文學行誼表率儒先數隨計
偕訖弗售晚以經授井邑從之游戶外履滿豐瀆不施天實
開二子聯翩奮白屋策高第念平生辛苦每約老去歸休必

四明談助

卷十九

十

同居踐昔賢風雨對牀之樂蓋豫名其堂已而雙立朝講讀
諸王邸高宗履位少君以舊學擢郎天官不幸早世長君獨
翱翔宦途握鄉郡使者節躋貳大府稱一代名卿用未渠究
不能媚合時宰袖手家食歷年多遂得償夙心考卜西湖之
上四子十孫奉先志深篤仲子尚書公入從出藩單俸稍贏
所益屋且百間糾集羣從春秋伏臘敬榮整愛中外怡怡簡
簡迨女婦妾僕無一嘖言家風翁清四遠羨喑踈瞻斯堂若
挹蓬嶠謂予托契同年命之記予與尚書公知聞閱歲四十
九投分爲最厚每一相逢歎其日進乎道特棋奕一事如寸
彎強弓與初時不少異亦見居心無競益足以彰其盛德云
公名大猷字仲嘉未老卽謝其事恩及諸房今直敷文學士

而大府公贈少師紹熙四年八月記

明州助教汪先生洙

字德溫父元吉以縣從事爲范文正公所知王荆公宰鄞亦稱爲廉平吏先生自幼善賦詩有神童之號九歲時牧鷺見鬢宮頽圯題其壁曰顏回夜夜觀星象夫子朝朝雨打頭世代公卿從此出何人肯把俸錢修上官奇而召見問神童衫子何短輒應聲曰神童衫子短袖大惹春風未去朝天子先來謁相公今世俗所傳訓蒙神童詩首列此章其餘多掇集古咏非公詩也晚授明州助教著春秋訓詁教里中人稱曰汪先生築室西山以講學啓迪後進子思溫傳見後思齊崇寧五年進士官吏部郎早卒聞蕊泉

四明談助

卷十九

十一

鄞縣志官爵有誤今遵臬堂耆舊傳改正

少卿汪公思溫

字汝直大父元吉父洙政和二年公以太學上舍中乙科教授雄州歷遷司農大府少卿知臨安府浙河以漁舟濟人每中流故弭楫索客多出錢或風暴至舟輒覆善泅者競取其錢物登岸公悉捕繫以殺人罪論更作大艦載客餘盡禁之相秦檜以故人屬薦公謝曰使其可薦誠不待相公論如不才卽相公言無益也檜積怒罷直顯謨閣食祠祿凡十八年卒年八十一

耆舊傳

汪莊靖公大猷

字仲嘉號息齋少卿思溫子也年四歲對客誦孝經止十

七章客問十八章何以不誦以具慶對客大奇之登紹興十五年進士累遷秘書少監兼給事中孝宗清燕每訪政事公請明詔編纂書成上進帝大悅後進敷文閣學士時二甥陳居仁樓鑰並居翰苑人稱舅甥三學士趙汝愚司馬伋並有贈詩卒年八十一諡莊靖著有息齋存稿公與史丞相浩同里并同年進士未嘗附麗以干進好周施叙宗族外族爲興仁錄率鄉人爲義莊捐田二十餘畝以爲倡衆皆欣勸詳見宋史本傳湖語所稱舅甥則學士有集鄉里則祭酒有會莊靖之明德尤其最也

朱文公送敷文汪公還鄞詩

濯濯才華耀禁林翩然忽起故園心九天得請恩方重一

四明談助

卷十九

十二

舸東歸春未深照眼湖山非昨夢及時花酒合同襟不應便作真狂客講殿行思聽履音

四明文獻錄黃南山贊曰孩提誦經客訝秀穎耄耄休官賜謚莊靖維時學士一舅二甥風流克肖有光四明

汪汀州之林 一作彬

字德仲莊靖公族孫幼爲樓宣獻公所器重言行淵懿善尺牘見後進道嘉言善行灑灑不倦賈似道少時游狎其母禁止之聞與德仲游則不復詰晚守汀州歸里以貧約終聞湖語十年窮困出處如一宣獻流風汀州獨絕註云汪使君之林樓攻媿弟子也不屈于賈家居十年

汪副使繒世

字漢文宋尚書莊靖公五世孫洪武初署行都督府掾授
太平府同知推誠馭下吏民不忍欺事恒先期而集嘗有
三虎踞林岡白晝飼人公爲文呪之虎卽遁去秩滿陞湖
廣按察司副使振肅憲紀以寬濟明人多懷之聞志

汪氏宋登科錄列後前有傳者不列

大辨

大猷從弟隆興癸未進士

文中

大猷從子慶元己未進士

之疆

文中從子開禧乙丑進士

立中

大猷子嘉定甲戌進士

之秀

文中從子嘉定丁丑進士

之埜

立中從子紹定壬辰進士

之邵

立中從子嘉熙戊戌進士

義莊應氏

甬上族望表義莊應氏本仁爲一望其妄祀衛公非也

湖語諸應隱約潔身不仕衛公之學猶存職志註云應處士

四明談助

卷十九

十三

本仁參政衛公之宗也今居王家墩語與族望表不合

應處士本仁

字本立曾祖伯謙爲宋觀察使以忠直名上遡衛國公嚚
歷世顯于宋處士以故家子義不仕元隱居城南博學好
禮嘗慕范文正公爲人建義莊五十餘間割田五百餘畝
收其歲入以濟人之困乏及婚嫁喪葬之不能舉者又卽
其中爲義塾延名師以訓族黨之子弟供膳服用悉有常
制時其出納定成條約使後人世守之郡以其事上聞詔
褒嘉焉翰林學士黃潛紀其事于石聞志

應氏義塾

在王家墩元隱士應本仁建置田延師以訓宗黨之子弟世

稱應家館聞志

湖語至若城西義莊敦贍鄉里實惟湖上之三老是綱是紀
非徒以拯困窮抑將以養廉恥史忠定汪莊靖沈端憲也如樓如應克恤

其族比轡范氏以修雍睦樓安撫應處士皆置義田以贍族更有義塾亦應

所置古樹樂樂于今未替藏書之富南樓北史宣獻東樓鴻禧碧沚最有

名宛委之山不過爾爾

葺芷應氏

甬上族望表葺芷應氏自昌國來參政衛公嚳始大為一望
參政應衛公嚳

字之道定海人嘉定十六年進士未第時袁越公詔為京
尹公掌牋記留門下一日坐有美堂欣然若有所得同門

四明談助

卷十九

十四

客最善樂府暮從外歸問何欣然也以擬明堂詔書屬對
甚善答之客哂曰一第脫饑寒猶未能明堂詔何施焉公
後直內制卒用所擬詔而客以樂府遊公卿困躓以歿教
授臨安鄭安晚清之見其文奇之安晚將拜相俾草相麻
後卒用焉已而安晚罷相居東湖益與公蒐拾文史號建
章集皆制誥所需安晚再相公復用以侍郎掌內制遂力
薦為內相理宗疑焉一夕召公入院降詔草五制夜四鼓
進入帝始信之翌日即除翰林學士後拜參知政事以疾

告歸曹志

沈方伯第

縣治南王家墩布政沈一中所居聞志宅東與梅園廟隔一漕

布政使沈公一中

字長孺號大若少與從兄一貫族兄九疇同研席知名人方之三謝萬歷八年成進士歷遷儀部郎中時藩藩負大力有所干請俞旨每從中出公爭甚強事得寢擢福建參政稅璫高竊與紅毛番通許其貢市爲疏請而番舶已泊津門公亢言疆臣無延寇入門理下令集舟師逼使去璫疏遂不行遷河南布政使徙貴州力請歸里逾年卒當文恭枋國公遠自引避每與客語終日未嘗一及相君人或徵起居唯唯而已所著有書禮二經補註梅園集耆舊傳方伯有園名福園在城北詳屠辰州空言註

沈禮部泰濬

四明談助

卷十九

十五

字洪厓號小若布政使一中子由明經官舍人晉禮部郎

中續耆舊傳

沈明經延嗣

字斯詵一字南郭布政一中之孫諸生泰淳子也沈氏自肩吾大若二先生詩才極盛雲將繼之此後稍衰先生出而又振之其魄力雄闊居然二祖之風爲人有英氣善飲酒亦喜講求食經之法故與錢丈寒灰朱丈柳堂爲最契先生初亦不肯出山後以家難委蛇就試非其意然卒不得售晚以明經貢太學嘗自題其小影曰爲晉處士爲宋遺民而今已矣故吾其泯君子哀之所著詩甚多今僅存

寸知居集二卷似非足本也

續耆舊傳

沈諭德延嘉

字顯申布政之孫公子泰灝子也崇禎五年進士授檢討直起居注充日講官時廷臣議獄多以刻爲能公講無虐犢獨章反覆切至次日遂下弛刑之旨丁外艱服闋遂不出南都建國以諭德召亦不赴 國初詔舉人才海道王爾祿將以延嘉應固辭而止左綬雲遺老傳著有文應文通文謀文格諸書及疏稿續者舊傳延嘉子光運康熙癸卯舉人曹志

陸氏掬花園

在竹嶼西南瀕湖面桃花隄其初爲孫秀才之業稱掬花處後歸于孝廉陸起元詳後蕭園註

陸武城起元

四明談助

卷十九

十六

字元兆萬歷戊午舉人由括蒼教諭遷知武城縣南都立國改官新安武城家素封居湖上其未仕時園亭之樂甲于雙湖陳都司民俊詩所云陸渾山莊似輞川者也亂後居新安不肯歸而掬花園者遂爲夫已氏所并亦不恤也久之遷于會稽蕉萃以卒著有掬花園集括蒼詩草續者舊傳

全謝山陸氏意園詩

在昔浚儀長幽居肖輞川花連隄上錦雲接洞中天南岸爲先

宗伯桃花隄西岸卽史文惠王之真隱洞天也鳩據因多難鴻冥遂杳然我來覓

陳迹重說義熙年武城以國難故播遷不返是園遂爲降臣所有

陳公籟竹枝詞

掬花名處自何年陸渾山莊似輞川隔岸垂楊堪坐釣水

窻長繫孝廉船

史雪汀竹東居

雪汀爲史忠宣彌堅之後忠宣第在東湖亦有第在月湖之北其後人散處不一雪汀徙于月湖竹嶼張尚書宅內與徐御史同門後遭回祿

史雪汀先生榮

字漢桓一字闕文號雪汀忠宣公之裔也熟于十七史尤精于小學兼喜爲詩晚年畧似誠齋工擘窠書及篆刻貴人踵門以求拒不答意所愜雖茶寮酒肆索筆揮灑最任氣一言不合輒成缺忤日益蕉萃陷于非罪之縲紲者三以此盡去其生平老友自顧孤另之甚所著有李長吉詩

四明談助

卷十九

十七

註竹東集吾悔集其風雅遺音已行于世

鮚埼亭集墓志

雪汀之

祖起欽字德明萬歷十七年進士知寧國府見續耆舊傳
徐廷尉故居

徐廷尉時進御史之坦祖居在柴巷回祿後遷于此 國初又遭回祿廷尉之後遷于青石橋御史之後遷于湖橋傳見各新第下

五岳軒朱氏

朱氏祖居在天封橋松江同知勳遷于石柱橋再遷于王家墩前有留餘堂堂左有玉樹右有玉芝其後爲遺安堂遺安之後有五岳軒題額爲董文敏公筆後爲祝融所燬無一存焉今柳堂之右其遺址也

朱氏家譜
獻臣記

自同知以後傳俱列于

下

甬上族望表朱氏都御史瑄忍辱道人金芝諸生鈇三望
都御史瑄係青塾朱氏不聞與天封橋同族

松江同知朱公勳

字定國號陽華善行源之孫藩幕應桂之仲子幼而識見
老成謂郭巨埋子養親得無傷親心乎父應桂之官留侍
大父源定省惟謹萬歷丁酉舉于鄉爲靖江令修學繕城
累清奸藪尤神于決訟聞志五載陞松江府同知治行赫然
以不畏強禦中蜚語而歸性好古所居五岳軒購先代法
書名畫彝鼎怪石充其中博古家所稱某物在四明朱氏

卽五岳軒也耆舊傳

四明談助

卷十九

十八

朱御史燾

字叔仁號穀城藩幕應桂之叔子登萬歷壬辰進士由中
書舍人選監察御史未受命丁艱起服擬補山東道未奉
命而卒趙端簡參魯爲墓志子墳光祿寺丞墳之子金章
金鉉聞遠俱諸生聞志

朱淮安基昌

號澹菴應桂伯子照之子以鄉貢歷官淮安府同知性醇
厚忠信文學與吏治並優有澹菴集兄培姪金顥俱諸生
子金芝傳見後聞志

朱休寧陞

字伯升同知勳之子天啓壬戌進士初令安福丁艱起令

休寧新學宮禮賢士決訟明敏會積勞致疾而卒聞志

朱博士維壩

字綠霞號嵩華應桂季子烜之子同知勳之從子以諸生授欽天監博士好古積學卒年九十一其湖南草高都御

史爲之序孫獻臣傳見後續耆舊傳壩誤作熊今依朱氏譜改正

附朱母李孺人

朱母李氏允清字蓮航比部振玉女孫文學志中女諸生廷鑑之配也甫九歲隨祖宦遊舟次母邁危疾潛爲刲肱以進疾頓愈得祖父家學其于事舅姑相夫子訓兒女待宗黨一循禮教而寄怡詩文有課紅餘藝及載德篇皆所著也得年八十有二省祝釐之貲增置祀田是德勝于才

四明談助 卷十九

十九

非區區衆美純脩足傳也聞志

忍辱道人朱金芝

字漢生亂後別署忍辱道人淮安同知基昌子也朱氏以好古世其家而道人更喜講學漳浦黃公授徒大滌洞天道人從之遊于學極博而以易爲專門甲申道人方在北方都遭逢大難削髮南遁流滯陪都又遇兵禍截江之役道人以隔絕不得預遂往來英霍諸山寨及太湖軍中蓋幾死者數矣董推官若思者其親家以海上之局勸道人歸赴同仇道人始返里門而推官死于告變之手道人不爲怵好事益甚未幾亦牽連被捕亡命深山久之喟然襍被長往有叩以所之者則曰吾將排闥闔故先訪三閭自是

踪跡遂絕其兄弟求之消息杳然

結埼亭集

忍辱道人集目

竹溪小記 賑荒議 練川唱和集 湘帆集 登樓

集 海南懷古集 玉笙篇 彈鋏篇 許可篇 素

心草 穀溪留別草 八音草 落葉吟 搗衣吟

雁書 聞砧草 海錯志

朱氏雅多異人徑山高僧雪嶠亦朱氏子也桑海之際

漢生與從弟柳堂從子餘古即獻並有志節柳堂之子

靜軒亦以詩名稱爲極盛顧今皆無後五岳軒中承祧

子弟或以豪強武斷自雄或爲市井之傑臭味絕不可

近以致文獻墜地君子傷之

傳後論

四明談助 卷十九

二十

句餘土音擬薤露詞

逝將訪三閭 忍辱道人從亡

六千里楚何渠渠三閭無地可卜居空勞女嬃淚洒徧湘

江魚二千年後道人朱忍不可忍遂長驅行行望天南逝

將訪三閭六千里楚行已墟湘江之魚死泥淤三閭魂散

空嗟吁

詩話朱君漢生亡命南行不知所終其出門時或問所

之答曰吾將訪三閭蓋從王于楚也

朱隱君獻臣

字曉庵博士維壩孫柳堂之羣從也娶于蛟門謝氏范文

香谷其僚壻香谷風格崛奇而先生之和平邃密香谷嘿

然服之亂後善收拾世家法物插架無算故有小五岳軒之稱最長厚雖潦倒厄窮而衣冠峻整非法不言非禮不履里中奉爲楷模留心甬上文獻修本支宗譜續者舊傳

深柳堂長朱鈇

先生字君賞知休寧縣陞之子家世多儲藏其所謂五岳軒者圖書法物甲于天下先生清俊閒雅出入車騎謙從甚都尤喜按食經欸客已而遭喪亂從事蠓灘鯨背之間四方失職之士至甬上必投先生匡牀夜雨應接不暇既棄諸生頽然自放焚香灌花流連潔供其鑒古玩半面了然尤其神眼擬之前宋遺民則周草窻一輩也初避地于黃公林尋返故居遭大火盡喪其所有怏怏失志家亦中

四明談助

卷十九

二十一

落有姬曰劉璧字崑白閩人善繪蘭亦能詩康熙癸酉去改步五十年矣猶以三月十九日野哭和澹歸師七郡大社詩聞者傷之自題小影曰萬歷遺民又越數年而卒所

著柳堂詩存六卷

續者舊傳

傳後記云先生最與錢蟄菴徵士相契風流醞藉同其高蹈亦兼有酒人之契每二人在座其觴政嚴肅諸公無不沾醉先贈公嘗言每大雪後過先生必以百花露酒斟柴窰巨杯代茶進之尚恐客不勝酒力置二雞子于其中飲畢援玉川七椀例請再進其雅致若此子曰如之何如之何佛云不可說不可說此先生深柳堂桃符也先儀部贈以詩曰往事傷心寧可說近來彈指竟如何卽此

附感時詩六首

吾鄉園亭余相國之飛蓋楊太史之空水李侍郎之來
誰謝太僕之天賜余幼且壯及見其盛今盡爲荒烟蔓
艸一遊覽不勝慨歎

兩湖城市漾波紋擇勝爲園自不羣桃李曾經酣夜月亭
臺今已冷秋雲玉樓芳草無嘶馬金谷華堂只聚蚊陳迹
早窺惟逸少興懷俯仰感斯文

退之金谷詩雖得一
餉歡有如聚飛蚊

三月十九日與友人言及澹歸貽梅村詩和原韻

五十年來屈指思

甲申至
癸酉

眼前白髮昔嬰兒乾坤顛倒忘

初位日月沉埋異昔時七郡喪心甘置酒一僧冷眼獨吟
詩與君重灑新亭淚話到傷懷欲碎卮

四明談助

卷十九

二十二

詩注吳梅邨于三月十九日集七郡名士置酒高會于
鴛湖席半有僧緘詩投入啓視一座失色後訪知其爲
澹歸所作澹公原名堡金姓字道隱庚辰進士事永歷
後爲僧

原詩附七郡名賢請自思座中若箇是男兒鼎湖難挽
龍髯日駕水爭持牛耳時哭盡冬青徒有淚歌殘凝碧
竟無詩故陵麥飯誰澆取贏得空堂酒滿卮
敝廬遭回祿後築垣除礫種蔬餬口越十七載矣庚戌
春盡奪爲牧馬之場短歌誌慨

滕邦五十已堪憐許子猶思受一廛孰意山河周八極寒
儒寸地不容旋

三軍奉令怒排牆馬踐園蔬斧伐桑頃刻捷音馳幕府紀
功首重是開疆

官民有地本分明邑宰仁慈勸莫爭牧馬應從元帥令輸
糧仍是爾書生

曾訴之邑宰張詞
臣其戲答如此

每看閨閣畫王香九畹貪思植衆芳此後畫蘭休畫地所
南異代共心傷

朱隱君洞

字孝酌一字靜軒諸生鈇之子也少稟家學其風流醞藉
彷彿其父隨侍秋水社中所謂碧梧翠竹者也及諸社長
相繼喪亡卽同輩亦多凋謝獨靜軒與恕齋稱二老所著
靜寄軒集尚有不能忘情于故國者斯其爲深柳堂中之

四明談助

卷十九

二十三

餘韻也

續者
舊傳

柳堂諸從隱君錡文學金鑑志洽俱有詩

集見續耆舊傳

鼈作人語

萬歷四十四年三月侍御某家包鼈鼈作人語曰毋傷我
湯旣沸猶云尚可活否則爲禍庖人不告有密語于侍御
者趨往觀之鼈已死剖腹一人長寸半具體無缺某大駭
不旬日死

李志

是事李本于啜墨亭集不詳姓名據五岳軒後人自稱
其祖上事則李志所稱侍御某者朱燾也侍御之孫一
爲名僧號雪嶠見句餘土音甬上雜歌附于三十九卷
殉難錦衣徐聖思傳後

張尚書心遠堂

在縣西南二里許尚書張時徹在城之居嘉靖志張尚書傳見
張家潭舊第下其城居第後與徐廷尉同居遭回祿今所稱
泥馬房者是也

張氏蕭園

蕭園在南湖濱張東沙尚書所構子邦伊闢之原其初爲孫
秀才之業後歸于張而分其左爲扠花處後歸太僕謝三賓
而扠花處則爲一鄉科陸氏所有高隱學敬止錄

屠田叔有張公子儒覺蕭園雜詩八首見詩集節錄三首

見說南湖曲張卿闢館齊偶來尋所好佳處詎能題蕭爽令
神王周遊使徑迷高低雖纍榭不用費攀躋

四明談助

卷十九

二十四

高齋吾昔到奇石爾能添枕簟衰年穩盤殮異味兼山梁容
雉响幽壑許魚潛薄暮奇雲出臨風上短簷
忽訝房櫳淨因知水竹清已增多少徑深愜往來情雲欲浮
三島樓疑壓五城羣仙紛可就取次下蓬瀛

謝御史第

謝閣學三賓爲御史時自月湖聖功寺巷徙居王家墩今門
額仍稱御史第在五岳軒朱氏之東

謝閣學三賓

字象三號研北晚號塞翁前御史升之後天啓五年進十
初知嘉定縣擢陝西道御史崇禎五年會山左李九成等
變起城邑圍陷上方震怒逮撫按諸臣三賓疏言成事在

人了此不過數月上以爲然推才幹御史代巡中丞簡舉
三賓特勅監紀軍事星馳以赴率八路三鎮進兵躬冒矢
石于是萊州圍解黃縣恢復時登州城猶未下百計督攻
弗拔最後用轟城策城遂崩湧師而入登州始平師旣旋
叙功晉太僕寺少卿甫數月連丁外內艱家居志聞乙酉夏
南都加戶部侍郎晉禮部尚書不數月以東閣大學士叅
機務丙戌隨阮大鍼迎王師又二十餘年而死著有一
笑堂集續者舊傳姪提學于道傳見沙泥街新第下

孔有德者山東叛將也吳橋初起不滿千人中丞余大成
孫元化議緩撫賊遂無所忌大掠濟南破六邑陷登州及
黃縣實逼萊城懷宗怒逮治大成元化以徐從治謝璉撫

四明談助

卷十九

二十五

其軍攻城之賊甚急蠟書求救將應之大司馬熊明遇固
請撫迺止及礮殺徐從治執謝璉殪太守朱萬年城欲潰
于是都諫陳于庭以公請公疏陳五策且刻期數月奏捷
懷宗大喜命巡撫山東監紀軍事公甲騎鞞刀前後運策
帥先鋒衝賊營南北兩軍夾擊賊望風東遁萊城食子炊
骸七閱月矣公兵不血刃而瞬息圍解迺乘勝追之賊兵
大敗又命陳洪範劉澤清突師邀擊賊奔亂墮海死者無
算黃縣拔公與副將靳國臣長駟抵登州築墉圍城用間
策射書入登城賊疑有內應殲其黨背城出戰馘巨憝李
九成破其軍取登州賊遁水城固守不克下迺穴大隧達
城隍實以火藥引羊腸綫遠發之水城崩入斬萬級浮屍

蔽海而下賊單舸出島會關寧水師副將周文郁舟至逐北三千里擒僞將殲之惟孔有德耿仲明由鴨綠江奔瀋陽而去懷宗聞捷加公太僕寺少卿兵備宋之僞誣公逸寇公遂引退

春草堂文約

孔有德降 本朝受封爵康熙初勢位尚盛故聞志但稱叛將李九成而不指孔有德至謝春草作此志時孔已伏誅始不必避忌但登萊平亂實朱公大典之功而謝春草歸美于祖赧顏甚矣當以明史朱大典傳正之

題視師紀畧

鮎埼亭集

謝三賓視師紀畧一卷蓋其自登萊還時所爲也三賓非有將才幸遇朱公未孩得成功遂加太僕猶以不得旄節

四明談助

卷十九

二十六

怨望而不知其乾沒賊營金數百萬不遭愆尤已屬萬幸矣其富既耦國遂有以告流賊者甲申之難其子于宣方官行人以此被毒拷致死晚年求用于 新朝總仗此多金欲以賄殺六狂生不克竟殺五君子以爲進取之路而新朝終薄其人不用也然殺吾鄉之正士則亦多矣甚矣此多金之爲厲也三賓知嘉定時以贄列錢受之門下爲之開雕婁唐諸公集其後與受之爭妓柳氏遂成貿首之仇南都時受之復起且大拜三賓稱門下如故其反覆如此而所擁多金至戊子以後爲海道孫枝秀勒取殆半三賓忿甚賂大將劾去枝秀以報之所費亦不貲于是其金漸耗遂蕉萃以至于死

天賜園

太僕有園在湖濱不與居第相連其初爲張東沙蕭園隔湖卽全氏桃花隄晨夕游覽無異己物陸武城旣居新安不歸遂并拘花園而有之號曰天賜

絳雲樓漢書歸謝氏

宋牧仲筠廊偶筆云王弇州先生舊藏宋板漢書得之吳中陸太宰家紙爲羅文箋字類歐陽率更是趙文敏故物卷首有文敏自作小像紫衣紗帽神彩如生弇州亦作一像于後弇州歿錢虞山先生以千金得之後轉鬻于四明謝象三虞山云此書去我日殊難爲懷李後主去國聽教坊雜曲揮淚對宮娥一段淒涼景色約畧相似順治間此書歸新鄉某公

四明談助

卷十九

二十七

近已攜往塞外矣京山李維柱字本石嘗云若得文敏漢書每日焚香禮拜死卽殉葬噫可稱好事者矣

趙文敏公漢書記

春酒堂文集

是書原係趙文敏公物故上存吳興畫像凡十篋王鳳洲司寇鬻一莊以得之陸太宰家後歸錢虞山宗伯崇禎癸未質千金于四明謝氏戊戌春歸張新鄉予得見之不數年新鄉以文字中孽死塞外不知是書所歸吳興畫像撮笠而縵纓虞山題後皈諸佛教欲以忘得失也吾不解吳興何意畫像其上其自以面目無愧于漢者而欲附是書以不朽耶不然將謂何代無陵律存遺制于是書耶又或知撮笠縵纓運未有已故留己之像于是書以爲之兆耶不然何以漢書之中

有威儀而非漢官者虞山絳雲樓悉宋刻庚寅之冬一旦化爲飛灰而是書獨以出質獲全今乃飄零失所以至此極似乎書之不隨絳雲而燼也皆吳興之像爲之也書之幸歟書之不幸歟嗚呼虞山往矣使其存予將就之焚香設茗作文以奠絳雲之餘燼而慰之當西臺之如意也

句餘土音甬上雜歌

鷗波道人書

絳雲樓中十萬卷鷗波道人漢書最珍奇晚以兼金歸甬上擬之江南國主揮淚別故姬

卽錢氏跋尾中語見有學

周郎展卷三嗟

咨漢書卷首何無漢官儀周郎斯言豈獨悼鷗波身世百感蓋紛披一歸海虞再甬上名節遞降難言之平康故院爭柳

四明談助

卷十九

二十八

妓晚來賣國同符契

謝與錢爭柳妓幾于操刀

不獨衣冠慙司隸周郎掩

卷封羊祭何不補寫平陵之歌弔翟義

詩話謝氏此書後歸張坦公侍郎以貢內府不可復得見矣

殉難行人謝忠節公于宣

字宣子閣學三賓之子崇禎十六年成進士授行人闖賊破京師將投繯其僕阻之旋爲賊執索金帛掠治甚酷械置馬棧中或以火炙之十指被拷俱折目睛突出寸許無乞哀語將死棄諸途年三十有一福王時三賓請卹追贈太僕少卿諡忠節蔭一子入監讀書

邱志

是時毛異人來賓有追魂法象三因其子在京被闖賊掠

死延請設壇追攝并求繪像置繪具紙筆于密室中及四十九日期滿啓視而繪像如生素箋十幅細書皆滿凡生平履歷家事瑣屑以至父母妻子閒語有人所不能知者縷縷曲盡聞志毛岐陽傳鬼像鬼書今猶藏于謝氏可借觀其字前弱後健其墨前淡後濃詳言被闖賊拷掠幾死歸寓後漸已養復被惡族串僕盜金投以毒藥而死并言毛異人遣神將闢鬼門及陰司中雜事隨問隨答無不縷述

余恭人傳

南雷文定

恭人余氏相國有丁之孫刑部郎中繩訓之女年十六歸謝君宣子是時宣子之父象三巡按山東而宣子家居與陸文虎萬履安讀書文虎曾謂余曰近得謝宣子不特秦

四明談助

卷十九

二十九

川貴公子固名輩之冠冕也一切厨養園畜之事皆恭人主之檢御名族靜然四屋崇禎癸未宣子成進士明年殉難恭人年纔二十八老人涕泣于堂上孤子悽惶于膝下丹旒歸魂青燈不哭九死之心空延鐘箭南渡哀榮死士于宣子贈太僕少卿謚忠節于是得封恭人改步之交皇風未暢鼎族阽危謠言沸起謝氏爲前朝大臣一門百口流矢影風顧有憂色恭人鎮以整雅如處無事雖屯苦脩經卒開否塞之運養生送死總歸禮教非其才識絕人何以有此子五爲霖同知州事爲兆諸生爲憲康熙癸卯舉人爲肱爲衡廩生甲申之變凡夫人之在京邸者或從子而死或從夫而死固皆地捲朔風庭流花雪而其景象

之慘惡者新樂侯劉文炳之杜太夫人集子女同死樓上其子婦先死次長女死杜太夫人六縊而後死少女縊斷而墜不得死乃開窗擲身樓下血如泉湧又不死有老蒼頭在側曰夫人何不死于井乎少女曰不可太夫人命同死一處豈得違之遂脫金條脫賞蒼頭重扶樓上助其結纒始死溫璜之死于新安其女年十四方熟睡母夫人推醒之女問爲何夫人曰死耳女曰諾父母各引繩尾縊之余爲之作傳淚涔涔不能止因念史遷絕無此等文字使後人讀之無不痛哭者宋之亡也文陸身殉社稷而謝翱方鳳龔開鄭思肖徬徨草澤之間卒與文陸並垂千古然則諸夫人之從死者固女中之文陸也若恭人者淒楚蘊

四明談助

卷十九

三十

結亦猶之謝方龔鄭皆天地之元氣也爲衡介萬公擇求余傳之蓋去宣子殉難之時四十七年矣列于謝于宣後博雅堂書厄

謝氏博雅堂丁甲申之亂遷書翠山山寇蠡起將長編大冊蘸油爲炬其短小者用實綿甲插架萬籤頓時星散

採春

草堂文約詳見翠山墳莊下

謝孝廉爲憲

字孝定號恕齋行人于宣第三子康熙二年舉人瀟灑自喜尤工畫或散漫數筆生意迴出詩亦不甚雕琢有自然之韻論者謂詩如其畫畫如其人喜延接後進晚年諸耆老凋喪畧盡總持羣雅者幾二十年著有偶存草

續者舊傳

謝公子爲衡

字孝德一字莘野行人于宣第五子也其才與兄爲霖爲
憲相埒一時有珠樹之目顧善病終歲多支吾牀蓐間爲
人敦篤尚古道楊推官兄弟之死太僕所下石也及曹給
事爲營葬莘野賦詩紀之因歎太僕諸孫皆能蓋愆然與
伯兄皆早卒未及充其所造殊足惋惜著有晨夕廬集

舊傳

續耆

恕齋出宰蓬萊下車詢太僕恢登萊故事泐碑以頌祖功
陟丹崖山觀海市著詩數千言徵邑之佳士分題刻燭相
娛樂而刑名錢穀非其所長踰年引疾歸庫帑大匱盡鬻
田園別墅金石彝器以償由是家徒四壁立矣君亦不介

四明談助

卷十九

三十一

意復與舊好往來酬唱或乘興揮灑烟雲獲潤筆卽治具
邀嘉客大會不顧詰朝炊烟將斷也嘗畫古樹適荒厨有
誚讓聲君遂題圖上云又是三杯一飽餐忽聞明日買柴
難腕中種得無多樹只可昂頭醉後看識者抱束薪易去
爲之一笑然苟非其人雖百求一筆不得也

春草堂
文約

謝文學于天

字德顯號筠軒封庶常三台之次子魯王監國時海上多
警封公挈家避禍文學生于會稽時封公年已五十三矣
甲午夏夜半不戒于火爇及乳媪床帳媪始覺寤自竄文
學從烈焰中有神人護翼趨出封公大驚且喜心私異之
弱冠補諸生師事陳怡庭先生時承累世仕宦家殖中落

文學佐理家政適歲大侵當人閉糴文學佐父賑濟甲寅
三藩背叛草寇乘機竊發長吏戒嚴文學佐父登城寢處
譙樓爲民望約三家抽一壯男各守雉堞而躬自擊柝扞
擷卒保全城文學曲成封公之令德大率類此著有晉中

吟滇草

春草堂
文約

謝太學爲雯

字守約諸生于天之子提學于道從子也平日喜攻古文
所居與從兄恕齋朱君靜軒衡宇相接每過深柳堂銜杯
刻燭未嘗出一篇以相示蓋必問心而安遲之又久而後
出其珍惜鄭重如此董孫符撰
文集序配范氏會元光陽之女會
元出守延平相攜往每公退樽酒論文欣然相得好遊

四明談助

卷十九

三十二

每得佳山水或遇高賢碩彥輒經年不歸歸則集里中耆
舊講道論文無虛日堂上呼治具倉卒杯盤咄嗟而辦蓋
得于內助居多范氏
殯志所著古文晚自約選成集名曰春草
堂文約藏于家至道光三年其彌甥江紹韓刻之行世

桂芳橋高氏

禮部侍郎高憲敏公閱其先自廣陵徙居于鄞聞志憲敏少師
世居甬上至學士文虎之子似孫晚年始遷姚江而諸弟如
尚書衡孫仍居甬上至今甬上之南湖有長春院桂芳橋皆

高氏舊物也

結埼
亭集

甬上族望表桂芳橋高氏憲敏公以大儒爲一望華文隳其
家聲得罪于朱子替矣疎寮亦廁身平原然而其三畧與詩

終列一望衍孫之六書亦爲一望凡三望

禮部侍郎高憲敏公閱

字抑崇號息齋弱冠入太學見楊文靖公時授以伊洛之學宣和間文體集駢偶公力爲變復紹興元年賜進士釋褐執政薦之授秘書省正字時高宗手書中庸儒行以賜新進士公言儒行多漢儒雜記中庸實子思所傳乞罷賜儒行又請預嚴水戰之脩帝皆嘉納之尋遷著作佐郎以言者論罷召爲國子司業時興太學三舍學法皆公所更定帝幸太學講易泰卦賜三品服擢禮部侍郎以直道忤秦檜罷歸口不言時事嘗作春秋集註推程子本旨言春秋非一王之法萬世通行之法也文武之道期于周之後

四明談助

卷十九

三十三

王周公事業期于魯之子孫其旨謂春秋非褒善貶惡而已樓宣獻公嘗爲之序又集厚終禮一編朱文公定家禮多用之卒贈少師謚憲敏聞志李堇山贊曰學宗伊洛龜山受知中興啓沃太學得師表章中庸春秋契旨吾郡儒林名光宋史

謝山湖語憲敏醇深宗師伊洛其在甬東首推正學拒昏勁骨天半諤諤五峯諍友不嫌攻錯闡獲麟之一編尤弟子之所淑是以竇桂之坊填酬而箎酢也注云高憲敏公閱兄弟五人登第

高華文文虎

字炳如憲敏公從子紹興庚辰進士歷官華文閣學士著

天官集註聞志

高文虎博洽名儒爲少司成時專以藏頭策問試士問目必曰有某人某事者士不能應但以也字對者字士之憤高也久矣會京尹趙師巽奏請盡以西湖爲祝聖池禁捕魚者作亭池上甚偉穹碑摩雲高實爲記其文有曰鳥獸魚鱉咸若商歷以興旣已鑄之石石本流傳殆不可掩無名子作爲詞以謔之云高文虎稱伶俐萬苦千辛作箇放生亭記從頭沒一句說着朝廷盡把師巽歸美這老子忒無廉恥不知潤筆能幾夏王說是商王只怕伏生不是你然無名子之嘲胡可深信蓋商字特筆誤而乘間而詆之

耳四朝聞見錄

四明談助 卷十九

三十四

高禮部似孫

字續古號疎寮學士文虎之子淳熙甲辰進士歷官禮部郎知處州著剡錄疎寮集子畧經畧史畧集畧緯畧詩畧騷畧蠲畧錢志續古少有俊聲不自愛重爲館職上韓侂胄生日詩九首皆暗用錫字爲清議所不齒晚知處州貪酷尤甚其讀書以隱僻爲博其作文以怪澁爲奇至有甚可笑者就中詩猶可觀也書錄解題湖語云疎寮觥觥追配范陸苦吟之餘尚聞三畧晚節微嫌平原入幕

高續古剡錄十卷四庫全書簡明目錄云崦故漢剡也故名剡錄徵引欬洽多唐以前遺文軼事其先賢傳必注所據之書可爲地志紀人物法其山水純仿酈道元水經註

例脉絡井井可爲地志紀山水之法

高尚書衡孫

公爲憲敏公從孫將作監文善之子端平乙未進士爲戶部侍郎知臨安府其爲檢正時史宅之括浙西公田官屬皆增秩二等公知不便獨辭賞歷官禮部尚書以壽終延祐志

高處州衍孫

高處州宅并竹墅在甬水門內

號竹墅以直閣知處州吾鄉嘉定以後故家之賢獨推高使君衍孫興寄冠佩清逸嚴整如晉世圖畫賢士宅旁植水竹奇石其食必按本草其居處必順叙寒燠銖分脉法作脉圖如指諸掌清容居士集著五書韻總五卷此書篆隸真

四明談助

卷十九

三十五

行草一字五體別體皆作小字隨體分注可脩初學者用學古編湖語五書博綜直追籀佚高冠長劍先型可卽註云高使君衍孫疎寮弟也精韻學清容稱其衣佩古雅爲嘉定故老冠

句餘土音賦高處州竹墅

詩話高氏知處州者二疎寮名似孫以禮部侍郎知處州竹墅名衍孫以直閣知處州

憲敏家兒數使君軒然如鶴立雞羣疎寮見譏尚書豫干史氏

理財之獨竹墅先生無可疵書寮畫苑資清德長劍高冠著

舊聞嘉竹墅有五體韻學又工畫清容謂城北先疇高並斗

憲敏本有竹墅在北湖南新榭綠披雲竹湖竹墅雖零落

猶有斜陽水面曛

高氏宋登科錄列後前有傳者不列

安世

乙卯兄紹興進士

閻

乙丑世弟紹興進士

開

丙戌世弟乾道進士

文善

熙安世從子淳甲辰進士

指

壬辰曾孫紹定進士

深

乙文舉孫端平未進士

桂

庚指兄淳祐進士

高氏醫學

吾鄉之高有二其一為憲敏公之裔衣冠極盛似孫衡孫衍

孫皆名人其諸子一清以醫學著見袁清容序其一為萬竹

先生之裔則明之志齋一派也近有與宋時高氏之醫牽合

者未之攷耳

結埼亭集

南麓

四明談助

卷十九

三十六

高疎寮居近城因城疊石曰南麓麓高數級登汲于甕泄之

以管淙淙環佩聲入方池池四五尺畫于扁自麓之後

登城為嘯臺

四朝聞見錄

長春書院

桂芳橋東達大街西達長春道院聞志所稱道院即書院也

長春書院記

節 結埼亭集

楊文靖公之在太學吾鄉士人從之者多而高氏兄弟五人

與焉所造之大禮部侍郎少師憲敏其渠也是時有蔣處士

季莊者隱居慈水力排王氏新學獨窮遺經不入城市憲敏

每積所疑造訪季莊不輕與人相接聞憲敏至必倒屣迎之

小廬促膝竟夕不倦憲敏告辭則季莊送之數里而遙論者

交重之吾鄉學派導源慶歷諸公至于伊洛世系則必自憲敏始高氏家居湖上其去長春門不半里故書院以之爲名至宋末而高氏子孫以爲功德道場諸志中所稱長春觀是也及高氏子孫散處無復居湖上者觀又改而爲菴佛火經幢比邱相對曾謂以憲敏之講堂乃至于此嗟乎高氏于宋世衣冠最盛疎寮之詩筆竹墅之圖畫至今皆有傳者然此特風流之鼓吹尚在可有可無之列憲敏之力肩正學百世之師也顧聽其蕪穢不治則何忍矣乃議仍改爲書院以奉憲敏之祀而配以季莊庶幾諸生得爲講學之地焉

附蔣季莊傳

蔣璿字季莊慈溪人宣和間鄙王氏之學恥赴科舉閉門窮

四明談助

卷十九

三十七

經不妄與人接高憲敏閱居明州每過訪輒相對講論忘寢食去則送之數里相得懽甚或問憲敏曰蔣君不與人周旋而獨與君厚何也憲敏曰閱終歲讀書凡有疑未判與闕而未知者每積至數十輒一扣之無不迎刃而解蔣君所長他人未必知之閱得爲知己幸矣

曹志本容齋隨筆

楊冏卿第

楊太僕美益自鏡水徙居于南湖之桂芳橋橋下有大文宗坊太僕爲提學時所建族望表總見于鏡水舊第下

楊少卿美益

字以謙嘉靖丁未進士歷官太僕少卿伯翼先生其子也

耆舊傳初爲提學御史歷布政司叅議大理寺丞

楊桓溪先生承鯤

先生字伯翼太僕卿美益之子少工詩年十五六爲諸生
沈嘉則先生一見奇之欣然曰今日建五丈旗當以楊生
居吾前所謂獬兒難與爭鋒也因作戲贈楊伯翼詩呼爲
德祖先生于是有重名于當世少所許每言是是非非賢
賢黜不肖此儒者大權斷斷不可枉嘗以年家子謁王弇
州司冠弇州見其行卷絕驚賞先生嘿然別去語人曰王
先生博大心慈客持片楮求譽輒津津不休人人自謂王
先生知己其知己多矣僕尚容廁其間耶既以太學生北
上作薊門行一日名滿京師客輻輳至不勝欸對病百餘
日卽謝歸性愛佳山水不極幽險不止嘗夜半過送骨巖

四明談助

卷十九

三十八

霧黑林深風颯颯豎毛骨怡然也于城南小築曰翛園日
嘯咏其中諸所從交游盡名士第一流著西清閣詩草碣
石編遺集二種行于世者舊傳沈嘉則贈詩見櫟社沈山人
傳後

屠田叔碣石編序云吾友楊伯翼謝世三載乃辛卯孟冬
十二日夜夢寄三十字于予曰承鯤無恙近居甌洛山中
見黑黃二鸚鵡弟設罝弋已得其一黑矣黃未獲也題封
宛然字字淒楚覺而惆悵賦詩曰夢裏開械淚欲潛驚回
梁月似君顏三年書札悲今昔一夕精靈托往還却恨帝
京爲下吏不知甌洛在何山鳧鷖鸚鵡終難辨蝴蝶莊周
栩栩間

脩園

太學楊伯翼構脩園于舍外有閣曰西清登眺水光野色

志聞

其與人書云家有遺業一區檉楓柏栗隱映若碧城風濤生

几席間菱菰荷芰蹲鴟薯預之屬至死不饑伏臘之暇想足

老矣其高致若此

耆舊傳

今宅後有紅木犀花大合抱橋西路

旁有小石坊上刊日涉所三字橋北臨河有楊家花園廟尙

是當時遺蹟

全謝山楊氏脩園詩

太僕佳公子風流別墅開神鴉飛護樹怪石已爲灰

楊園中花神祠

今爲里社香火極盛

地踞雙湖勝人稱一代才誰傳猗兒語吟眺幾徠

徊

四明談助

卷十九

三十九

屠鳧園云脩園在老龍灣西有長春圃泛爽亭諸勝觀其

詩集可見全先生詩謂在城內者非予謂陳公籲所咏竹

枝詞亦言脩園在城內闕疑可也後見高隱學敬止錄知

脩園果在老龍灣西楊伯翼所建又有長春圃在甬水門

外塘河之北楊太僕少子少海所建伯翼皆有詩今補錄

分隸于兩處

陳公籲湖上竹枝詞

春山銜日半城隈寒食家家掃墓回游屐但聞簫鼓近合羣

爭向水門來

湖隄盡處爲長春水門

揚雄泛賞柳依亭岸圮亭荒柳不青遺墨至今人競寶脩園

無復草元經

天多老人楊秉紘

老人字祈收太僕卿美益曾孫也謝山先生撰老人墓志曰明楊氏自文懿康簡公以來宅望爲鄞第一老人于推官瑤仲兄弟爲父行國難時共從戎江上老人見事不可爲不受官及推官兄弟娣姒六人仗節死而老人以遺民力扶汐社爲楊氏宗老人最多學讀書不拘古人成見尤精考索里中後輩遙望見老人曳杖來輒雜遯迎之聽其談故國事滔滔汨汨以爲異聞然皆樵史之助也老人自丙戌以後頽然自放所著書甚多其浙江水利考尤詳覈早喪子年踰八十更遭大火偕其老妻匍匐烈焰中勵免歎曰我已無國無家今又無書是天多我也因自號天

四明談助

卷十九

四十

多老人然神明尚不衰常言苟得容膝之地生平著述尚可一一記出適有延之課子者老人以爲如願欣然而往旣適館設崇筵于絳帳含杯未飲而卒

殉難推官楊公文琦 烈婦沈夫人

殉難職方楊公文琮

殉難御史楊烈愍公文瓚 烈婦張夫人

殉難都事楊公文球

楊氏四忠雙烈傳

鮎埼亭集外編

鏡川之楊以文懿公大其弟康簡公冢宰碧川先生並起五世中有四開府三翰林兩臺諫四監司而守牧以下無論也時人爲之歌半壁宮花春宴罷滿牀牙笏早朝歸以

榮之又六世而四忠雙烈出焉遂以收三百年世臣之局
跡其一門被殲不謂不慘然而爲故國增重矣四忠者長
監紀推官贈兵部都給事文琦字瑤仲號楚石次職方郎
中文琮字天璧其第三弟文瑛早卒次監察御史贈都察
院右僉都御史文瓚字贊玉號圓石次都督府都事文球
字天琅太僕卿美益之元孫澤州通判承龍之曾孫諸生
德邁之孫監紀推官秉鼎之子秉鼎字公鼎能守文懿之
教以名節最諸子里中以楊太公稱之推官尤喜交當時
豪傑以引進其諸弟然家貧甚推官娶沈氏御史以舉崇
禎己卯科始娶于杭之張氏而以其婦粧爲職方娶李氏
截江之役太公視師諸子從軍御史初入臺力言浙閩宜

合不宜分卽使主上屈節于天興將來無損于配天之業
時方爭開讀禮多不以爲然而同里張公蒼水尤出揭力
排之御史乃入閩思文召對又言當聯絡閩浙以爲同仇
不當啓爭端閩強而浙弱莫如輸閩餉以助浙自足以服
其心思文然之卽賜食撤御前燈送至邸丙戌春以溫陵
饑按視疏發帑金三千賑給歸而陳四難十失諸奏疏皆
名言也已而浙東亡仙霞告急思文出走方思文命御史
之溫陵問知其有兄臨軒試之對言今日當作馬上天子
未可狃承平積習思文奇之以明經授惠安訓導加監紀
推官至是來就御史商所向而太公挈家至初張夫人尚
居杭已而道斷夫人多智畧歎曰干戈載道吾當從夫以

死耳其家力阻之不得潛自小壘渡江時兩軍列成夾岸鉦鼓朝夕震中流交鬪每日數合飛鳥不得過而夫人忽脫免至皆以爲從天而下也會江干事已不支乃謀奉太公入閩留職方居守以都事從甫至推官御史適他出亂兵突過之夫人走伏草間賊執太公以去索萬金不則烹都事散髮狂號于路路人憐其孝不數日得金數千入砮奉太公以歸俄而推官兄弟返避地于泰順之竹園欲求思文消息以謀扈從卒不得乃返甬上時浙地止翁洲未下而寧紹台山寨遙相首尾于是有五君子之難推官與大闌寨王翊最善故在五君子中獨主西南一道張夫人謂御史曰翁洲黃將軍未可信宜慎之御史亦以爲然不

意翁洲未嘗愆約而華公過宜所致大闌帛書中途爲人所得密揭告變並列推官御史名旁及都事而獨遺職方時推官兄弟聞變或勸之逃推官曰吾以義動而臨難不赴且將陷父子辟何用義爲然偕死亦無益吾獨承之御史不肯乃獨遣都事入閩推官就訊但言御史不預謀請釋之以養父而自請速死初華公已獨承帛書中事欲盡脫諸同難以故同難亦多不承者而推官獨不可于是當事議坐推官而脫御史推官遂與華公同死旣殯張夫人謂御史曰難猶未止可速去御史猶豫未決夫已氏復以賄請于當事而殺之張夫人負御史尸紉其首哭盡哀忽曰楊郎死忠分也何以哭爲因治棺衾皆雙具召畫師至

寫雙影語家人曰吾死矣然吾宗刺史文人也乞之爲楊郎兄弟作傳吾死瞑矣刺史者前高唐牧德周也年老畏禍逡巡不敢執筆夫人爲書遺戒曰楊郎無愧于天地無愧于國家偷生一載有爲而然妾今從之亦可無愧于楊郎聞者皆哭夫人拜謝于太公之前投繯而絕沈夫人噉然而哭曰吾姒烈矣吾後之哉亦自經監國還軍翁洲皆贈官而都事之入閩也錢忠介公已卒乃謁劉閣部中藻于福寧閣部令參幕府軍事時都事尚未娶閣部欲婚之曰謝三賓讐首未懸未可也閣部益重之次年福寧不守都事死之初張公蒼水以爭閩事不喜御史至是海上貽書謂楊氏一門忠節如此當日悔其參辰并以詩弔之職

方乃間行謁張公把臂痛哭託以聯絡中外事自是職方每歲往來海上不絕太公亦弗以前禍爲戒勉以善承家風而海上之局日削職方悲憤益甚癸卯太公卒是年有降卒自海上言職方將引海上將趙彪爲患逮至錢唐歎曰吾父以天年終吾可死矣且吾固雁行中漏網也賦絕命詞扼吭而死李夫人先卒楊氏自戊子以來經再籍寸縣粒粟無復存者庶弟文珽文玠暨諸姪皆以職方故遣戍斃于道一門遂盡推官兄弟俱有集御史尤多其稿俱不傳惟落花吟一卷猶存

職方于翻城之役株連四及得不死後以通書張蒼水就逮赴省扼吭死其絕命詞曰憑誰瘞我孤山上魄是梅花

鶴是魂歸安韓炎士殯之湖南山寺韓卽求仲之子也截江之舉欲聯閩中以助浙者御史最有勞已而事去其謀會同山海以復江東者推官之力居多當禍作之時牽連御史參軍而職方獨得脫推官御史被難參軍逃之劉公中藻軍次年亦以守福安死假令職方柴門謝客自託于養父以終身有何不可而必不自晦奔走海上求遂其兄弟之志以相從于焦原則亦良可悲矣結埼亭外集又十二年而御史之同年前進士太僕石門曹廣葬楊氏父子兄弟十棺于鏡川惟都事無骨可歸招魂以紓之續耆舊傳乾隆四十一年 賜文瓚謚烈愍文琦亦入忠義祠

錢退山肅圖詩

四明談助

卷十九

四十四

曹給諫爲楊侍御舉葬

日沒蒼山狐晝啼蒼山埋盡千秋骨天地爲之久崎嶇氣作虹蜺高嵒嶼西陵萬古冬青青金粟堆邊黃土平誰駐西頽一寸景滄鯨不飛鴉不鳴猶憶當年楊御史流涕危言閩浙事曾弭兩闕齟齬嫌歷歷風霜篋中字邈矣山河猶斷絕月冷粧亭舊宮闕一輩高賢凌替盡荒城赤漬平原血依稀史相殉孤耿衣冠招葬梅花嶺一時慕義何無窟高風亦足令人景御史與先忠介公悲歌飲恨心迹同海波墓田今何所臺山相國曾孫舉黃門營葬風義深三十餘載捐黃金吁嗟勝事光先後黃門黃門洵不朽句餘土音擬薤露詞

獄中好讀書 楊太公訓子

寄聲問兩兒兒死甚得所今當未死時且勿安惰竄兒莫念阿翁阿翁賴有汝三楊舊家聲于以光厥祖君子論進修沒身長攻苦兒其念阿翁卽此足慰撫兩兒再拜謝嚴訓銘肺腑兒手不停披用以當陟岵兒口不絕吟詎敢誇繩武嗤彼玉局翁湯火驚魂舞

詩話太公五子四人皆死王事推官御史死于戊子參軍死于己丑職方死于癸卯方推官御史之被禍也太公寄語令其獄中讀書推官以詩答父君子以爲三楊之流風也

妾面憊 楊烈婦寫生

四明談助 卷十九

四十五

郎真好鬚眉裝以故冠帶含笑隨伯兄羽化聽天籟可憐吾宗老縮朒眩利害有姪怯表章潛德定終晦爲呼好畫師雙寫烏絲界重泉頸血影透出東絹背郎顏真精英妾面則已憊所幸皎然軀對鏡堪無媿庭前雙鸞巢接翅有餘態郎乎遲妾行妾影未及佩

詩話五君子之禍其妻殉者四而小楊夫人與華夫人最烈小楊夫人爲其夫乞銘于宗老之能文者宗老畏禍不敢乃呼畫工寫影并寫己容畢乃死自小楊夫人殉而其妯亦死

瘞孤山 楊職方卜兆

廟社遷矣骨肉殘矣誰瘞我孤山且復遊神梅鶴間誰知

天意憐岑寂更添老伴埋湖灣魄爲梅魂爲鶴東瞻鏡川
路漫漫聊隨老伴遊孤山

詩話職方兄弟四人先後死故國而職方爲殿其臨終
則賦絕命詞願葬孤山卒瘞湖上已而蒼水雪竇二墓
相繼卜隣不殊脊令之同穴矣

楊文學式傳

字雪巖嘗館于語溪曹太僕遠思家因葬楚石圓石十棺
者卽其人也續者
舊傳

月島

劉戶部珵月島詩和者王亘 舒亶 陳瓘

衆樂亭前月滿洲雨餘風靜正中秋桂花冷射千尋碧十頃

四明談助

卷十九

四十六

湖光爛不收

夕陽盡處見滄洲一片清光水國秋應是玉眞梳洗罷菱花
臺上不曾收

何人騎鶴上瀛洲清影明波正九秋吹罷玉笙端不見滿堂
桂子有誰收

月明偏照海邊洲綠水迴環漾素秋斗轉參橫羣動息桂花
零落遣誰收

明聞隱鱗龍月島篇

朝來乍晴復乍雨湖中五月猶無暑我家住近澄湖旁清風
朗月常爲主月島亭亭距漢津登臨一度一回新縹緲樓臺
驚不散葳蕤花木受長春雪汀烟嶼參差出簫鼓樓船競來

集清虛絕勝廣寒宮幽閒宛在華胥國廣寒宮闕青天上華胥未必人能往何似盈盈一水間朝朝暮暮堪遊賞皓魄晶瑩湖水清夜深臨泛不勝情風鈴似解江妃佩天籟如聞子晉笙昔人見月已陳迹今人見月還悲昔借問將來月下人萬古誰爲不死客嗟予頭白畏風寒好月何曾得飽看莫遣來宵風雨妒合尊促席更邀歡

謝山十洲志云竹嶼之下爲月島劉琨詩曰衆樂亭前月滿洲以其斜對柳汀也牢家橋當其南均奢橋當其北

竹嶼過月島其水從牢家橋河兩分東經七牧廟旁出牢家橋轉北經南社壇橋九曲巷橋後所營橋至水則亭入平橋河其西畔近三支衝口瀕湖有方井井北有二石柱對立若水倉然恐卽牢家橋河分水入湖處其水北行經湖心東橋間字橋憧憧東橋從碧沚菴左入平橋河月島之上爲牢家橋宋氏鑄冶坊邵氏永寧巷費氏花果園廟信天緣堂建碑橋宋氏等蹟

牢家橋宋氏

今稱社壇橋宋氏遠近數十家與建碑橋之宋不同族 國初有宋北川者精于女科名載聞志其後人世傳女科同族貢一人義士一人

宋商英字浦江諸生葵芬之子好學篤行中乾隆乙卯科副車隨寓自安嘗館于竹林巷吳氏別業于齋前雜植卉木蒔菊數十本花時集舊好飲酒倡和積成菊花詩一卷課餘注

王深寧七觀全謝山湖語學未有艾惜早卒弟商南邑廩生
商南二子俱諸生

義士宋魁先少習經營托業烟鋪雍正元年大旱求雨不應
義士思欲救濟生靈立起虔誠齋戒沐浴往天井山捨身觸
龍大雨沛然無不感念有司上其事請旌表部議以家有
老母不合例于是里人立牌位神像于郡廟中香烟不斷

鑄冶坊邵氏

鄞獻表稱鑄冶坊邵氏鑄冶坊在南社壇橋之北巷今邵氏
散處不一中丞第在社壇橋之南巷

甬上族望表邵氏提學玉刑部郎城二望

邵提學玉

四明談助

卷十九

四十八

字德溫舉宣德十年鄉試累陞順天府教授用兵部尚書
馬昂薦擢雲南按察僉事提督山東山西江西學校以足
疾納祿歸其教士先嚴義利之訓嘗三典文衡卒以清約
終身門人李東陽表其墓子莊舉成化甲辰進士仕終按

察副使

嘉靖志

邵刑部城

字守齋隆慶二年進士遷同知永州府值鄉試公爲同考
官時江陵張相國子赴試主者欲錄其子公獨執不可及
閱一卷心知爲相國兒卽大勒數行及他考官覓得見已
被抹乃止出闈遷刑部郎至京而江陵已聞抹卷事大怒
將中公危法公度不可久居遂拂衣歸與同里屠緯眞儀

部日觴咏爲樂晚竟不出士論惜之耆舊傳

江蘓巡撫邵公墓

字學址號思蓼父惔字真長以碩學爲里黨師屢躋場屋年踰艾始舉鄉試未幾卒公幼承父指授康熙五十九年舉鄉試第一次年成進士選入庶常授編修再改御史巡視京西舊奉使者外吏競有賂遺公性素介盡却不受回時襟被蕭然上廉知之始有意大用改給事中侍直上書房再遷副都御史出入禁廷小心謹畏屢膺召對密有獻替不一語人雖妻子亦不知也乾隆元年充會試總裁官尋主順天鄉試釐正文體所甄拔皆宿儒尋奉命巡撫江蘇正身率屬苞苴不入其門行部過無錫縣有司

四明談助

卷十九

四十九

以惠山泉餉却之曰是卽飲貪泉之漸也未幾與河督議開毛城鋪不合遂并與江督左公素羸至是積勞乃得疾上命公子南歸侍疾而公已不起遺奏至京予祭葬如例初公爲侍郎時賜邸舍內城遷寓惟衣一簾書數篋及撫吳蔣吉士拭之過之見曝薨魚于庭曰此鄉味吾適遣人歸里因命致此其後諭祭使者至門所居在隘巷不容肩輿則步以入矮屋不足以設廣筵則畢事于簷溜之下使者太息而去子鐸字景夫乾隆元年進士以庶吉士改檢討早卒結崎亭墓碑族弟陸字東侯乾隆庚午舉人酉陽知州墩字安侯歲貢生工詩著有冶塘詩鈔因掌教四川梁山書院遂寄籍忠州梁山縣其子鋈嘉慶辛酉選拔

卽于是科四川鄉試中式孫漳邑廩生

邵侍郎洪

字海度別字雙橋巡撫基之孫檢討鐸之子以巡撫遺恩
欽賜舉人辛卯成進士公生七日而孤家徒壁立奮起
孤童讀書慷慨持大節不可以勢力屈其需次吏部也久
之始得補主事引見 高宗遂得 眷注屢進員外郎中
出爲湖南主考河南四川學政皆以廉明稱 上意會用
事者忌公剛直乃久淹郎署始得撫州知府至用事者得
罪 仁宗踐祚親政事驟擢公自郡守一歲中得布政所
以慰勵公者甚至嘗陳奏籌補江西倉庫有知人最難得
人則治彌補之事無使病民汝酌行之之諭公旣感激于

四明談助

卷十九

五十

是盡絕藩司所入無名陋例又斥其養廉所入先有司出
以濟公如九江建兵房廣昌修城瀕江臨湖修墟田隄岸
皆立捐數千金不以累郡縣于是羣吏相率激勸兩年之
中彌補三十餘萬倉庫日盈而閭閻無擾旣而調安徽以
觸熱入 覲往返數千里安徽告饑勸卹不遺遐邇民受
其澤而公病矣公旣持廉至是益困告貸于里之有力者
始得歸已復躋卿貳以禮部侍郎終子桓候補戶部員外

東井文
鈔墓表

趙敷文賃屋

宋嘉祐間月湖丈尺圖云趙敷文賃屋取湖心寺東岸四丈
四尺當是今花果廟近方地

花果園廟

縣西南二里祀宋將軍杜愷愷隨駕之明州力禦金寇民德而祠焉

嘉靖志

宋建炎時將軍杜愷護高宗駕至四明嗣以病

作舍于花果園園有安南異獸牡曰**蠡**牝曰**蠹**常與愷伴後愷病卒葬于太白山二獸亦死淳祐元年郡中大疫愷擁獸示靈有禱輒應民益德之乃爲立祠以石琢二獸形列之門

首聞志

花果園廟記

結埼亭集

花果園廟肇造自史氏其廟神卽司園之土神也明中葉忽傳爲建炎將軍杜愷而立載入嘉靖府志中近有費緯祉者作記敷衍其故事謂將軍以扈從至鄞舍于史忠定王之園

四明談助

卷十九

五十一

將軍本籍祥符忠定曾令祥符故相善將軍卒于是園卽立廟祀之并有墓在太白山之說攷建炎扈從諸公如鄭世忠張鱗潘廸李顯忠皆有後人居鄞太率緣扈從居此者固不敢謂杜將軍必無其人也但忠定乃紹興十年進士而建炎以前已令祥符其誰欺乎或曰史氏之貴始參政重政元年趙楷榜進士祥符之任當屬參政則時代適當後人訛傳爲忠定未可知也然攷史氏先世本居湖上自越公遷大田山中而葬下水子孫皆居焉其復歸于湖上自忠定始而園之建更在忠定歸田以後其於參政無豫也然則將軍寓園之事盡屬流俗所傳不足信况自成化以前之志無載之者其謂將軍官鎮東將軍世襲金吾不知宋無四鎮之官乃六朝

時官制也尤不攻立破者矣

信天緣堂

宋朱翌由灤山徙鄞居於月湖乃建信天緣堂自爲之記聞志
甬上族望表信天緣堂朱氏居西湖本灤山人也少師翌爲
一望其從子軹爲一望

省事老人朱翊

字新仲其先安慶懷寧人以太學生賜第高宗南渡爲秘書監屬喜其才俾預修徽宗實錄歷官中書舍人在朝敢言事秦檜相逐趙鼎公以鼎黨久貶韶州後召還知嚴宣徽三郡公告老不赴朝廷憫其饑寒計貶所十四年衣俸悉與之遂卜居鄞作信天緣堂記書於壁乾道二年卒年

四明談助

卷十九

五十二

七十自撰墓誌丞相周益公必大論其詩似杜牧之而出處亦相類號省事老人寶慶志其子軹類公遺稿灤山集凡四十四卷周益公爲之序載錢志湖語云桐鄉東來說詩之雄灤山妙句穆如清風自託信天嗤漫畫之無庸也宋注

桐鄉屬
守慶府

四庫全書簡明目錄灤山集原本久佚今從永樂大典錄出其詩源出蘇黃古體排冝縱橫才力特爲富健近體亦偉麗伉壯喜以成語屬對多妥帖自然

信天緣堂記

灤山朱翌撰

朱子北游于瀛莫之境徘徊于塘灤之上睹二禽有感焉一類鵠色正蒼而喙長凝立水際不動魚過其下則取之

終日無魚終不易地其名信天緣一類鷺奔走水上不問
草腐泥沙唼唼然必盡索乃已無一息少休其名曰謾畫
信天緣若無能者乃與謾畫均度一日無饑色視謾畫加
壯大後三十餘年屏跡荒縣私自念少之時始官州縣月
俸錢二千米石五斗麥如米之數十口之家取足矣而官
朝廷祿十倍之然日食肉猶一臠衣常百結退視其室其
空如故南來已老內外食者四十人婚姻賓客伏臘不論
論其常一歲錢千二百緡米百八十斛拱手靜坐炊烟屢
絕家人告曰室罄矣翁不恤何也今幸營之尚可支否則
俱爲餒鬼懼無以應呼使前曰天生匹夫一飯已定于未
形吾固爲爾長多圖未必得坐視未必失也世間豈有一

四明談助

卷十九

五十三

門同日困于無飯者天之所賦自應不闕子去轉告爾朋
姑洗爾釜待之行有餉子者矣有老媪北婦人也在旁大
笑曰翁豈信天緣乎曰是遂以名堂書其說于壁
句餘土音賦灞山先生信天緣堂

詩話雪窻張武子灞山朱新仲南宋詩人之雄皆僑甬
上

詩人在南宋灞山最雄獨禁錮緣豐公大節誇獨鵠

先生以趙

豐公鼎之黨彼斥

淵源出景迂緒言猶可掬豐公旣餓死甘心遂

初服蕭閒寄意信天緣嗤彼謾畫空逐逐一枝聊以寄卑
栖豈知百世懷芳躅當年湖上多朱門而君偃臥一茅屋
到今朱門亦何有何如茅屋爲不辱阿儂亦散人早著歸

田錄誰憐家食貧貽詩當推轂吾師信天緣嬾更遭局促
又朱氏附

宋儒朱長文號樂圃受春秋于孫明復得發微深旨作通志
二十卷書有贊詩有說易有意禮有中庸解樂有琴臺志自
成一家書子發序淳熙十四年九月朱侗進伯父長文春秋通

志十冊付秘省玉海又著吳郡圖經續紀三卷分二十八門徵

引博而敘述簡其曰續紀者吳郡有大中祥符中官撰圖經
長文于元豐中繼有此作也又墨池編六卷分字學筆法雜
識品藻贊述寶藏碑刻器用八門又分子目十有九皆引古
人成書而編類之蒐輯頗富間附論斷亦多典核琴史六卷
前五卷載古來能琴者一百五十五人各爲小傳末一卷分

四明談助

卷十九

五十四

十一篇記琴之制度捐益音調沿革文詞雅贍而採摭該博
在所作墨池編之上又著樂圃餘稿十卷附錄一卷前有原
集一百卷南渡後燬于兵火其從孫思求得詩一百六十三
首文二十九首編爲此本而以誌傳之類爲附錄一卷長文
與徐積齋齊名積齋文怪偉長文則明白坦易不務爲奇崛
之言蓋各肖其爲人也四庫全書簡明目錄

永寧巷費氏

費氏先世汝南人宋建隆中有諱顓者官慈谿縣尉因家焉
後徙郡城凡二支一居永寧巷又名礮橋巷一居錦帶橋西即三版橋
居永寧巷者自明洪武間徙居錦帶橋者萬歷間徙傳俱見
錦帶橋下

縣社壇橋

寶慶志註鑄冶坊巷一名勞家橋巷宋時縣社壇在焉今稱南社壇橋東過大街達寶雲寺巷西達湖心東橋

敬止錄

韓家橋

寶慶志云廡院側南俗名碯磻東抵鎮明嶺西達鑄冶坊巷宋處士教授里中

今建碑橋南有宋氏宗祠卽其舊居

宋先生恢字宏之以經術授里中子弟及門最盛陸康僖公瑜其最著者也先生嘗憫郡中文獻失徵因選天順成化以來諸名士詩合爲一集碧川楊公見之深善其意因從抄一本以授子茂清其後南江戴公更抄此集因爲增輯序之所

四明談助

卷十九

五十五

稱四明雅集是也吾鄉有選詩本于此

甬上耆舊傳

建碑橋

敬止錄云在月湖東畔昇平橋今名館駟橋東南側北達府基巷南達鑄冶坊巷

四明談助卷二十

月湖東岸三址之竹嶼月島錄竟終及菊花洲東岸三址之盡處也此爲府治第三條朝沙

菊花洲

劉戶部瑄菊花洲詩

和者

王亘

舒亶

陳瓘

金蕊含香冒雨開清無俗格絕塵埃休嗟不及東籬下也有幽人載酒來

年年重九爲人開不染春風一點埃湖上蕭騷如栗里虛尊還待白衣來

懶對陶家酒甕開東籬寂寞久風埃會須結取登高客折上龍山醉帽來

四明談助

卷二十

一

光景不留人易老恨無羽翼出塵埃世間那有飛昇藥且傍汀洲采菊來

謝山西湖十洲志云月島之下爲菊花洲史氏寶奎里在焉直至平橋河而止近人誤以爲松島

自月島過菊花洲其分水東出湖橋接均奢橋來水轉北經九曲巷橋後所營橋至水則亭入平橋河西出建碑橋轉北經館駟橋從碧沚菴左入平橋河菊花洲之上爲史越王府馮制使宅豐尚書宅史忠宣宅方氏花廳高麗使館寶奎廟水則亭在明爲高麗張氏張中丞第張方伯第陳太史第柴巷徐氏葛榜眼第徐御史第施都督府等蹟

西湖史氏

甬上族望表史氏本居城中西湖之上至八行先生詔始居東湖及子孫貴城外東湖之七十二山城中西湖之十洲歸史氏者皆十七焉史氏一門宰相三人執政二人視執政恩數三人侍從二人卿監四人其餘不能悉數也而得列于望者則別有取焉八行先生詔第一忠定推薦乾淳諸大儒有功儒林第二和旨先生不受忠定推恩之官父子甘于隱退第三忠宣如荆公之有魏公不阿其兄第四獨善先生第五自樂先生足與獨善齊名第六文靖不護其子第七鴻禧君不阿其祖第八璟卿爭奪情以身殉之第九果齋先生力紹朱子之學第十詩人則友林先生文人則蓬廬共十二望史氏十二望傳分見各第下

四明談助

卷二十

二

贈冀國公史簡

冀公爲明州從事奉母最孝公事之餘卽具甘旨遊十洲間大吏俗人也怒其不告摧辱之冀公抑悒而死子越公詔勵志讀書旣被徵遁入大田山中延祐志謂冀公以用杖輕忤大吏而死者非也當考忠定公所作五世招魂詞

湖語註

贈越國公八行先生史詔

字升之父贈冀國公簡母贈冀國夫人葉氏先生葉氏之遺腹子也自少嶷然有立志律身甚嚴而事母極孝嘗與豐清敏受業于城南樓先生郁遇大比輒引避每曰無母氏之節已無史氏矣誓終身母子不相離日與其妻徐奉

養彌謹善居鄉里民有爭鬪從先生求直不復訟官大觀二年有孝友睦婣任恤中和八行兼修之舉以詔應命不赴遂與母避居邑東大田山鄉人稱爲八行先生生五子後孫浩貴累贈太師越國公

聞志

史參政才

字德夫一字聞道太師浩之從父政和八年進士由遂昌丞歷進右諫議大夫拜端明殿學士簽書樞密院事權參知政事其爲右諫議大夫時上言浙西民田最廣而平時無甚害者太湖之利也近年瀕湖之地多爲軍士侵據累土增高長隄彌望名曰壩田旱則據之以漑而民田不沾其利水則遠近汎濫不得入湖而民田盡沒望詔有司究

四明談助

卷二十

三

治盡復太湖舊迹使軍民各安從之今載入宋史河渠志參政之可傳者祇此而已

結埼亭集

太師史越王府

在月湖東忠定越王史浩之府賜名壽樂又有眞隱堂在月湖中竹洲

聞志

月湖丈尺圖云史越王府至史丞相府街五十

一丈九尺

府前有世祿坊忠定四子長子彌大字方叔官少師建第于月湖之南竹洲

卽松島

理宗賜名鴻禧其子朝奉守之心非叔父所爲退居松島賜碧沚二字次子彌正終敷文館待制未建第三子彌遠字同叔官右丞相謚忠獻建第于月湖之西

袞繡橋理宗賜名觀文府幼子彌堅字固叔以資政致仕謚

忠宣居月湖之北卽今寶奎廟右其子賓之避嵩之爲相以
敷文乞休老于滄洲傳俱見各第下

太師史忠定王浩

字直翁紹興十五年進士除國子博士因輪對言普安恩
平二王宜擇其一以係天下望高宗納之以普安郡王爲
皇子進封建王以浩兼直講一日講周禮酒正言世子膳
羞可以不會飲酒不可以無節也王作而謝曰敢不佩斯
訓三十一年遷宗正少卿會金主亮犯邊下詔親征王疏
請爲前驅浩力言太子不可將兵以晉申生唐肅宗靈武
之事爲戒王大感悟奏請扈蹕以供子職詞意懇至高宗
知奏出于浩語大臣曰眞王府官也帝還臨安立建王爲

四明談助

卷二十

四

皇太子遷浩起居郎兼右庶子孝宗受禪遂以中書舍人
遷翰林學士張浚宣撫江淮將圖恢復浩與之異議隆興
元年拜尚書右僕射首言趙鼎李光之無罪岳飛之久冤
宜復其官爵祿其子孫悉從之浚入覲乞降詔幸建康浩
陳三說不可退又以詰浚曰帝王之兵當出萬全豈可嘗
試以圖僥倖復辨論于殿上浚因內引奏浩意不可回恐
失幾會乞出英斷于是不由三省樞密院徑以金字牌自
命諸將出兵方數月而浩始知王十朋又抗論之浩乃辭
退出知紹興遂予祠自是不召者十二年淳熙五年復爲
右丞相時朱熹教授生徒于建寧山中浩力挽之出守南
康十一月詔軍民喧闐者並從軍法浩言民不宜以軍法

相律不聽請罷政遂罷爲少傅七年以浩爲少傅薦江浙之士薛叔似楊簡陸九淵陳謙葉適袁燮等十五人後皆擢用十年八月除太保致仕封魏國公治第鄞之西湖上建閣奉兩朝賜書又作堂帝爲書明良慶會名其閣舊學名其堂光宗御極進太師紹熙五年薨年八十九謚文惠御書純誠厚德元老之碑賜焉寧宗嘉定十四年追封越王改謚忠定配享孝宗廟庭

宋史本傳

著鄮峯眞隱漫錄五十

卷

跋宋史史浩傳後

鮎埼亭集外編

吾鄉史氏一門五宰執忠定雖以阻恢復事爲梅溪所糾然其立朝能力薦賢者乾淳而後朱陸陳呂楊舒諸公皆

四明談助

卷二十

五

爲所羅而使諸子與楊舒諸公遊尤爲可敬故終當在正人之列其一參政二丞相一樞密皆不免清議史臣特著獨善先生及璟卿蒙卿三公世有補宋宰相世系表者史氏可以生色矣然諸史中尚多賢者不祇三人而已文惠之子彌堅累官潭州安撫使其平土寇行義倉極爲眞文忠公所稱累勸忠獻辭相位不聽遂祠祿于家凡十六年加資政殿學士吳泳鶴林集內制行詞有曰在熙寧則不黨于熙寧如安國之于安石在元祐則不黨于元祐如大臨之于大防寧宗御書滄洲二字賜之卒謚忠宣文惠從子彌應嘉定七年進士不爲諸兄弟所喜交游之來言時事者輒退之陳習菴序其詩曰余外家赫奕寵榮蟬鼎相

望獨舅氏自樂翁常罹讒退居閉門求志行吟空山有詩數卷宣患難之所志傳逸度于將來仕終海寧尉其詩後爲宋梅磻所刻世所傳自樂山吟者也習菴大儒許予不苟則自樂亦史氏之君子也又朝奉大夫守之文惠孫也心非叔父所爲中年避勢遠嫌退居月湖之陽著升聞錄以寓諷諫與慈湖諸先生講肄不倦寧宗書碧泚二字賜之忠獻每有所作必曰弗使十二郎知否愚以爲當合忠宣自樂朝奉爲一傳獨善與蒙卿爲一傳璟卿別爲一傳合成一卷碧梧翠竹以類相從庶潛德不終湮而宗袞亦未嘗不藉以吐氣也

忠定微時貸坊錢

四明談助

卷二十

六

史忠定浩未第時僦天童松徑富民錢氏坊以養母越國夫人洪一作梁氏紹興甲子夫人壽周甲子忠定假坊錢爲

壽禮甚具坊故屬浙東常平司至秋七月不勝輸官之苦留繫于越宿賣餅湯媪家是歲鄉試期已迫忠定不得歸里鬱鬱悵望媪問曰秀才何負官逋如是遂具以對翌日媪召兒與共約曰我積錢百千以治後事今悉與秀才輸官若中秋試必速償我毋惜也忠定歸果與計偕實紹興之十四年至乾道中忠定以袞衣鎮藩養夫人于越時媪猶無恙命使者車迎媪坐堂上拜之欲官其子媪謝勿受曰願丞相子孫他日官越毋忘媪家時賑與足矣後忠獻彌遠爲常平使者復造媪家拜其像與其子坐且遺金帛甚

厚至樞密之嵩帥越時湯媪諸孫猶在樞密紹先志如初迨

元時忠定五世孫公升猶藏貸錢手券鄉老應文煒能道

其事清容居士題史忠定貸錢券後

史越王翬仙霞嶺

閩由浦城往浙必度仙霞嶺高三百六十級凡二十八曲長二十里宋史浩帥閩過此始募翬石路行者便之周櫟園

小記

德壽宮隆禮

淳熙二年二月朔日孝宗過德壽宮至石橋亭中觀古梅命內侍宣史浩至賜坐太上以黃玉紫心葵花瓊宣勸浩捧觴爲兩宮壽君臣皆沾醉小內侍密語史相公小酌

四明談助

卷二十

七

上聞之謂忠定曰滿酌不妨當爲老先生一醉喜賜玉帶一條片腦一金合紫尼羅二十疋御書四幅忠定謝而歸

聞志

史越王青詞

前載史越王辭免太傅表得之聞見以爲出于余公天錫之父暨儲行之孫沐録示則非辭免蓋青詞云反本狐邱寓誠獯祭念此闔門之多指迫于投老之一身云云欲用侵尋歲月八十有三未有其對訥齋馮端方在坐應曰補報乾坤萬分無一王稱賞久之未知前今所載孰是吳門友人之子胡北訪余公天錫之弟天任于四明因舉聞見所載余公天任曰是也蓋先伯所對但歲月二字非是

其易爲甲子天任與天錫爲同氣後繼其季父云

葉紹翁四朝聞

見錄

史文惠薦士

淳熙五年三月史文惠浩既再相急于進賢如初朱文公熹呂公祖謙張公栻曾氏逢輩皆薦召之朱公熹不仕幾三十年累徵不就于是文惠勉以君臣之義卽拜詔惟張公栻不至蓋文惠與其父魏公浚淳熙初議和戰不合也君子立朝議多不合張公何慊而不至蓋猶泥於本朝避嫌之制云

同上

史丞相答拜鄉曲

史忠定罷相歸經慈谿邑宰蔣鶚遠迎既見邑吏而下皆

四明談助

卷二十

八

叅羅拜庭下忠定答拜蔣宰跼躄請免忠定曰閣下與之有名分某與之爲鄉曲自是不同

聞志

史越王洛迦見大士

紹興十八年史越王以餘姚尉攝昌國鹽監三月望偕鄱陽程休甫由沈家門汎舟風帆俄頃至補陀洛迦山詰旦詣潮音洞寂無所睹炷香烹茗但椀面浮花而已晡時再往一僧指巖頂有竇可以下瞰公攀緣而上忽見金色身照耀洞府眉目瞭然雙齒如玉天將暮有一長僧來訪云將自某官歷清要至爲太師又云公是一好結果底文潞公他時作宰相官家用兵切須力諫後二十年當與公相會于越遂告去送之出門不知所在乾道戊子以故相

鎮越一夕典客報有道人稱養素先生言舊與丞相接熟不肯通刺疾呼欲入謁亟命延之貌粹神清談論鋒起索紙數幅大書曰黑頭潞相重添萬里之風光碧眼胡僧曾共一宵之清話遽擲筆不揖而行公大駭徧遣兵吏尋覓不復見追憶補陀之故始悟長身僧及此道人皆大士見身也

寶慶志

史忠定有功儒學

湖語舊學甘盤黑頭潞公三經箋故之書爲儒苑所矜式而中興大儒俱荷翹車之辟相業之偉所關在國脉也註云史忠定相孝宗御書舊學二字賜之時有異僧稱之爲黑頭潞公所著尚書周禮論語義俱簡當而尤有功者中興大儒朱子陸子而下大半皆其所薦晚年出山謂人曰此行可以已但因朱元晦尚未召耳其愛賢如此未可以爲梅溪所糾竟没其善也

謝山于忠定薦朱陸一事再三敷敘洵爲定論至其阻出兵之舉則忠定老謀碩畫好謀而成魏公憤兵僨事梅溪助之皆非也

黃東井評

史刪定父子不受爵

湖語塵視軒冕有如浮雲刪定父子之遺徽眞絕羣也註云史刪定涓不受忠定推恩之爵其後以授其子彌林亦承父意不拜見剡源集

月湖老漁

湖語饒州雅人經術是治退居晴湖愛聞魚計註云史使君定之也著有太極圖論著說鄉飲酒儀月湖老漁集

史氏六老圖

史忠定浩淳熙乙巳挂冠年登八十女兄年八十二四弟又皆高年同氣至親舉觴相祝朱顏華髮咸壽而康繪爲

六老圖樓叅政爲之序

山堂肆考

方氏第三府

方國珍據慶元爲弟叅政國瑛建第三府于問俗坊在史越王第宸奎閣之右世所稱史府菜園者也歸附後以賜李指揮齡太祖命詹孟舉書武鎮坊以旌之後爲張方伯第者也

今猶共傳花廳之名

結埼亭集

四明談助

卷二十

十

張中丞第

縣治西南武鎮坊都御史慈谿張楷徙居于此

聞志

甬上族望表西湖張氏自慈水來經畧都御史楷所遷也其居卽方國珍之第三府四川按察副使曷一望 今爲高麗

張氏所居

都御史張公楷

字式之慈谿人永樂二十二年進士宣德間擢御史出爲陝西按察副使同靖遠伯王驥巡歷三邊上安邊十二事言多采用正統十二年驛召至京陞僉都御史巡撫京畿時沙縣賊鄧茂七反八閩相挺爲變命公爲監軍總制閩浙得便宜行事凡破寨三十六招降八十餘萬人斬獲無

算景泰元年班師入朝適都御史余仕悅與公有隙因黜其功削職歸天順元年詔復僉都御史致仕公少孤事母極孝爲人坦易闊達善推轂賢者其學自經史至天文醫卜無不通習善行草篆隸尤長于詩平賊事詳曹志

游擊將軍張公應麟

字伯厚都御史楷之子也以游擊將軍從石亨出戰大同有功世襲鎮撫公家居教子曷有法曷中進士出知鉛山縣公貽詩戒曷曷次父韻以答里中傳之曷卽所謂神明

御史張公也

耆舊傳

附寄子詩一首

阿曷爲官出宰鉛蕭然信息喜眞傳官清亦飲齋中水俸

四明談助

卷二十

十一

薄休分堂上錢苦志但能全汝節怡情自解樂吾天先公德業三朝重幸有遺安百畝田

按察副使張公曷

字仲明號棟莊其先慈谿人祖楷都御史徙鄞公舉成化八年進士授鉛山知縣性剛明不惑神怪有姝女者及門而失女兩家互訟官不能決公行邑界見大樹妨嫁欲伐之率衆往有衣冠三人拜道左求宥叱之忽不見公怒手斧之卒仆其樹樹巔有巨巢墮二婦人言爲狂風吹至樓上與三少年俱其一卽前所失女也有寡婦子爲虎所噬少年欲難公代婦書牒請得虎抵罪公與婦期五日乃齋戒祀城隍神約繫虎至及期二虎果伏庭下叱曰食吾民

者法當死無罪者免一虎起斂尾去一虎伏不動公射殺之以畀婦一縣稱神君諸異政多類此

聞志

擢南京御史宏

治元年七月帝免喪遣官告孝陵將祭陰雲忽變暴風大

作公偕同官上言畧陳弊政帝嘉納之先是雷震孝陵柏

樹公與同官黎鼎共劾大學士劉吉等十餘人其後吉修

隙擬黜之尚書王恕再疏爭起四川按察副使歲餘引疾

歸環堵蕭然知縣丁洪公鉛山所取士也旦夕候起居爲

具蔬食及卒含殮不具洪爲經紀其喪

明史稿

所著有歸田

集棟莊集寓鳴集經史訓戒

耆舊傳

公生平喜獎勵後輩常以道義相期通政余南湖先生本

親炙侍教有年及公疾革余先生尚侍側公張目視曰善

四明談助

卷二十

十二

自愛方今人才肯自勵者少若能扶持一日是培國家士

氣一日也其立身報國之誠至死不倦徒傳公異政抑末

矣

耆舊傳後論

陸粲庚巳編云公初知鉛山縣時有賣薪者嗜食鱻得薪

值以其半市鱻命妻烹而食之一日自市歸乘饑恣啖少

時腹痛而死隣保疑妻毒殺之執送官拷訊無他狀獄不

能具公初蒞任嘗白晝登堂忽睹門外有綠袍烏巾者冉

冉而入左右悉不覺也及行案前長揖公疑之坐乃言曰

吾邑中某鄉之土神也鄉有冤獄未白公問其事神曰吾

鄉民某甲之妻以殺夫繫獄此人本中鱻毒而殂非婦罪

也公欲驗之但置鱻水瓮中有昂頭出水二三寸者必殺

之試烹以啖他囚而死則其事白矣言訖不見公異之詰
且如神言試之得昂首者凡七設釜于堂召此婦面烹之
出死囚于庭與食纔下咽便稱腹痛俄仆地死公謂婦曰
汝冤白矣遂釋之

附詩一首

答家大人

阿曷爲官出宰鉛蕭然消息祇虛傳敢圖魯令傳三異應
效劉公取一錢故國桑榆留晚歲浮雲名位聽高天種瓜
未必東陵好賴有遺安數畝田

公爲令時父錦衣公以一詩戒之公和答卽用其起末

句知公所承家訓矣

者舊集評

四明談助 卷二十

十三

萬季野詠史詩

投銀釵

宏治時吾郡張公曷以副使家居日昃不能具早膳夫
人慍甚出所藏銀釵以易米公問所從來告以門生所
遺公取而視之卽投之水中卒不得食

副使歸來室如洗架無懸衣盎無米留得銀釵持易糧那
復奪將投水底怨莫怨兮廉吏妻苦莫苦兮清官子身有
妻子不能養天下誰如張副使

敬止錄採崇禎間故冊云張麟本府慈谿人父右僉都御
史張楷正統十四年麟隨楷征福建鄧茂七值欽募義勇
赴武清侯石亨處試中軍前效用戰敵也先進虜景泰元

年以戰大同功授試所鎮撫送留守右衛三山門千戶所帶俸後調寧波衛後千戶所支俸成化十一年例補本所原額所鎮撫管事

傳蓮

父卽張昺御史

承宗

賢

體立

世臣

升四川遊擊

紹勳

高麗張氏

甬上族望表高麗張氏文節公知白之後也嘗以避兵入高麗故稱之今改名雍睦堂張氏知靖安縣伯庠卽築雍睦堂以居兄弟者殉難兵部尚書煌言殉難諸生槌共三望

張忠烈公傳見府學右新第下雍睦堂本在西臯其後人遷居于此故亦稱雍睦堂張氏西臯雍睦堂記附見後知縣張公伯庠

四明談助

卷二十

十四

初名瑞以字行號西畦元末其先人避地高麗還里人遂稱爲高麗張氏公少嗜學有大志嘗上書太傅屠公少宰楊碧川先生論科場之弊爲時所傳已舉于鄉授知蕪湖縣有巨商犯法夜餽千金公却之竟按其罪尋改知靖安在官六年將入覲聞逆瑾擅命遂悵然解組歸里公天性孝友事父色養備至兄弟四人雖一果片脯必與同味食指約五十餘乃別于宅南築室與諸弟奉父以居名曰雍睦堂里人遂更稱雍睦張氏父卒年八十八公哀禮兼盡晚年惟與堇山李先生堂葺齋袁先生孟悌常相唱酬所居齋曰西畦書屋因稱西畦先生耆舊傳殉難處士張先生槌

處士字子隆號四岑知縣伯庠之後世以孝友著里中稱
爲雍睦堂張氏乃元時方平章花廳至今存其名兄梗早
卒處士七歲能作大字稍長補弟子員會國難作日咄咄
尋有改易章服之令閉戶取牀頭陳醞獨酌既醺遶牀走
百餘匝乃取炭和木屑爇之置所臥炕下別沽火酒飲數
巨觥臥炕上覆以重衾俄頃酒力墳盈而絕續耆
舊傳
句餘土音擬薤露詞

下策資火攻

張山人醉酒

忠臣不易爲死亦我所苦我將以樂死投彼麴生譜猶需
熊蹯期羈我室皇屨下策資火攻麴生定所許酒行既已
酣火烈亦具舉山人冉冉升導以赤日羽

四明談助

卷二十

十五

詩話山人自稱四岑居士不肯薤髮盛夏飲火酒極醉
置火床下覆以重衾酒力與火力交作未幾遂成紺人
可憐故閣學張僕晉降

可憐故閣學反覆如轉圜殺人已無算豈知終不博一官
王積翁蒲壽庚猶能賺取恩賞不恥喪令名如何乃公百
無成嗟命窮死後何以朝毅宗不見我家主人布衣猶死
忠

詩話四岑山人之僕篤老能言故國事每語及謝氏輒
曰可憐故閣學喪心至此令人不忍見之

張文學汝翼

字旦復號學齋儒士梗之妻葉氏少寡無子其姒生文學

卽抱而撫之文學嘗自塾歸母問讀何書曰大學母出一巨帙授之曰此吾嫁時外大父以贈爾父者啓視則眞西山大學衍義也由是有志于聖賢之學黃梨洲之甬上遂請業焉講經之會諸人談論鋒起徐以一言析之聞者皆意愜梨洲每稱之張旦復王文三皆篤行君子也

敬義堂集

張節母鬻產濟公

張儒士梗妻葉氏年二十四而寡無子以從子汝翼爲嗣課讀甚嚴每述祖宗來雍睦家法以相勉有己產數畝當歲饑公家欲鬻以濟急時葉歸母家忻然命其子曰家口嗷嗷以我故共靳之汝往立券則無嫌矣其輕財好讓如此年七十卒妣黃氏庠生挺妻亦少寡與葉氏晨夕相依

四明談助

卷二十

十六

曹志

重修雍睦堂

杲堂文鈔記曰君子所居常以其人重餘風流澤蔭潤後賢雖復一區之宅十尺之舍其子孫能守高曾家法敬而不忘卽奕世尚稱之斯其所以久而益重者也吾鄉右族四姓一爲張氏其居西臯者世以孝謹聞卽里中所稱雍睦堂張氏也堂起于西睦先生時先生名伯庠成化中舉于鄉官蕪湖靖安二縣令有廉名以惡逆奄瑾解組歸里起堂與兄弟四人養父其中均財合困無所少間子錄爲西碧公嘉靖中以明經官長汀令治縣有父風歸橐罄然惟得雍睦堂養母與二弟諸從同居子瀛字寧洲爲諸生

有名適隣人失火燄逼雍睦堂忽風反得全里中頌之寧洲君因出依外家范氏居君四子次子樾最賢是謂二靈君復歸起雍睦堂與兄弟四人居身任婚嫁事在萬歷中君三子次子汝翼卽吾友旦復也旦復出爲叔父三萼君後其孝友益著少善讀書慕歐陽氏之文稱名諸生凡後生從授經多得中甲乙科今歲旦復與弟汝爲謀稍葺補雍睦堂懸故額于上身率諸從奉先人遺訓執孝謹旦復祈得余文記之以表世德余爲喟然曰君子所居以人重信然也自余少時所見郡中諸大家治宅華堂新啓麗甲一時曾不數十年改題額字已非復翟公之堂或侵爲馬廐老兵橫臥其門子孫過而不敢問而張氏獨能保先人

五世遺宅瓠葉素豆伏臘其間卽今日稍爲葺補重懸堂額窻櫺城石仍是此堂故物風雨僅除燕雀亦不賀而吾輩摳衣登其堂古意肅然與旦復兄弟執禮辭讓彷彿有成宏間風味蓋張氏恂恂守高曾家法幾二百年于斯矣所謂君子所居愈久而益重不亦信哉且余得讀張氏家乘此堂自西畦先生始立學士白齋豐公爲作記以比于姜伯淮一門及西碧公重修進士馮公應奎復記之至余文而三焉張氏孝謹如昔日卽其堂構亦如昔日也吾知旦復異日雖離疏釋躋重起其家必能安先人庠陋無增廣于斯堂是則旦復所重仍有在而亦可卽此堂以驗之者矣遂使以余文書之堂壁

張方岳第

縣治西南紫薇街布政張淵所居聞志正宅面南宅東跨河建大門石欄雕琢絕精巧前爲張中丞第高麗張氏亦居此本係元時方平章花廳方氏之前尚是史氏世祿坊舊物布政使張公淵

字維本號纓泉少孤依其族人在陳州者遂以河南鄉舉中進士授興化府推官甫到官目攝道旁有作睨眎狀者卽收訊之果逸囚坐如律一郡大驚攝仙游令值瀕海塘壞而歲方大禋公請發粟廩授役塘成民賴以活百萬計遷工部主事出知武昌府以異等遷按察副使脩兵紫荆關平妖賊染大林晉遷貴州布政使以忤時貴遂投劾歸

四明談助

卷二十

十八

里公持守廉介里居復十餘年多盛德事所著有革象新書萬物數注較六壬天文圖說諸書行世詳見耆舊傳

同知張公鳳墀

字宸宣號丹霞布政淵之曾孫世尚清白萬歷四十年舉于鄉授涪州知州踰年遷同知興化府初先生曾大父嘗爲此郡推官有生祠先生至每以佐郡所行焚香上告已而投劾去時里人王右仲知涪州李玉海知營山俱以直道見忤一時解組論者惜之先生初爲諸生出無衣及舉孝廉方製一紫花布袍服之數十年每飯嘗盛一甕器僕夫偶損一角請易之先生笑曰三瓦不全此世間豈有完物吾不與易也其風格若此詳見耆舊傳長子錫丁天啓甲子

舉人次子錫麟寀俱諸生

附詩一首

先方伯公祠下作

先公祠廟此方存今日重來得掃門
墮淚百年傳故老遺容三世見曾孫
奉嘗敢較桐鄉厚伏臘終思召父恩
澆罷蘭椒徵舊事手摩碑蘚盡堪論

張河內起宗

字亢友一字萼山諸生鴻儒子也康熙辛未進士授河南河內令令民闢荒田數百頃濬濟河以資灌溉邑賴其利捐俸徧設鄉學造士甚多性剛簡居官三載與大吏忤請告歸公生平作文甚富尤精于駢體詩多七言近體少受

四明談助

卷二十

十九

知于臬堂工書善畫尤多方外交所著有高梧閣集二十

卷續耆舊傳

又張氏

張吏部文燧字湛生其先自鄞徙通州登崇禎甲戌進士歷吏部文選郎銓法精通爲時所稱爲人和易詳整好學工屬文善行楷書兼精繪事風流文雅咸推重焉聞志從父櫟芳萬歷丙辰進士吏部郎中弟文輝崇禎甲戌同榜進士徽寧道從子士甄順治己丑進士吏部尚書選舉表

葛榜眼第

葛榜眼世振自小溪高尚宅徙于此今武狀元坊下有龍鳳旗幹夾卽其隔河大門凡葛氏列傳俱載于高尚宅舊第下

以便彙觀

柴巷

宋末錄事參軍河南柴望因路梗居鄞卜宅月湖之東至今

稱柴巷

聞志

在史越王府前今通湖濱歡喜菴

馮制使宅

宋嘉定間月湖丈尺圖云馮統制宅取湖亭東岸一十八丈八尺湖語旌勳有門馮制使之遺榭也注云由均奢橋北直抵柴巷而止皆馮制使宅

甬上族望表馮氏有世爲殿帥者曰湛曰櫛見清容集御前副都統制馮公湛

字瑩中泰州成紀人也曾祖宗旦左監門衛大將軍祖瑀

四明談助

卷二十

二十

昭慶軍承宣使父康年集慶承宣使皆以忠勤任職公山西將種膂力絕人嘗從集慶公履危橋偶隕深洞卽躍入抱持以出時人美其孝壯其決而知他曰必能捐軀犯難以功名著見于世自吳越春秋及他書傳多所涉獵舅劉公錫錡兄弟皆中興名將深奇愛之教以兵機將畧敏悟英發益自負有掃清關洛之志順昌之役錡以孤軍大破烏珠精兵二十萬公時在兵間身先士卒陷陣却敵由是以驍勇顯紹興三十一年金亮渝盟有長駟之志且欲以舟由海道進襲詔公措置山東借補忠翊郎權破敵軍統領冬十月與浙保總管李寶入海州金遣尚書蘇保衡孟都統及母弟阿瓦率舟千餘泊膠西衆十餘萬別以萬人

道新橋趨海州公請先擊之以挫其鋒寶許諾卽勒兵四百五十人及左翼軍千三百人結陣而行至新橋與金兵五千人遇力戰克之夜半還城密與寶謀我軍新捷敵必益兵而來何以禦之不如奉詔登舟攻其無備可以得志寶然之詎朝偕行次于石臼關趙王世隆趙友來降言膠西敵兵甚悉公以友爲鄉導尋至唐島望見敵舟率五十爲陣甚衆而整有張五蓋危坐舟中者友以蘇保衡告計獨剪滅此則其餘不攻皆破而天時方寒風不自南何以前進焚香禱之須臾南風盛猛波濤洶湧戰艦乘之縱橫若神敵相顧駭愕俄有七星黑旗褐裘衷甲駕巨艦率銳卒而至者矢發如雨友復以阿瓦告公挾一矢斃之奪其

金牌獲百尺船敵人膽喪迺投戈請命公卽躍入番船以漢軍百五十餘人來卽其船實薪草乘風熾火縱之北岸延及餘船烟焰漲天敵兵驚潰溺死者甚衆時二十七日也晡時寶方至火猶熾燔藝林木殆盡尋以所俘詣寶賀寶嫉其功恚曰何賀將執之公卽脫身舟中愈益自力至牢山卽墨人王彥于宜與其父老請乘兵威糾合諸州忠義收復山東公見其誠乃使高翔偕進翔卽墨人習知山川形勢勇于立功卽舉兵破縣忠義士爭歸之衆至五萬公獨念主帥嫉我不獲乎上事何由集不如姑歸乃授翔方畧攻濟南爲復故疆之漸遂引兵還海州十一月自海抵明十二月獻俘闕下天子嘉歎其功賜金帶銀千兩官

承信郎護聖馬軍碑將授李寶節鉞議者謂論功行賞宜以公爲首朝廷亦具知之及公擒李承富五百餘衆遂以公爲統領而代寶屯江陰以暴白其功焉隆興元年權知濠洲改建康左軍同統制明年金犯淮東西公說都督分遣諸將邀敵歸路絕其糧道而縱兵以擊之三請督撫不從敵四騎來以講和告公疑焉索之得江面圖靴中請督撫誅之旣乃勞遣而還公以爲敵情叵測釋此不誅彼悉吾虛實有輕我之心因集軍士鬻之敵人讐服而督撫不悅凡公爲將忠于爲國而不肯苟同者類如此師還爲建康水軍統制乾道初歷樞密院定海水軍統制五年召對論制敵取勝之法公言定海之屯止于脩禦請屯平江之

許浦自江入淮進取爲便識者韙之羊舜韶之衆攻劫海州上下舜韶者羊家寨土豪始欲取金州縣旣而兵糧俱缺途窮爲寇公表奏其故請往招撫以百人自隨乘輕舟由許浦趨淮口布宣德意舜韶感服散遣徒衆復業束身歸朝轉公武翼大夫淳熙四年被旨來覲未及奏事而怨公者中以危法飛語上聞大理按驗累月事具獄上天子察公無他薄其罪謫居潭州六年山賊陳峒起郴犯道之江華連破州縣湖南騷動安撫使王佐奏請起公爲兵鈐統制軍馬進至黃沙寨伏精銳林莽以爲之脩峒黨俄集大呼奔突伏兵發射峒弟殺之賊始却衆心稍安乃築室聚糧爲久駐計每出戰必克公念此窮寇急之則致死不

若以計困之乃養威持重有所擒獲縱之使去曰吾渠魁是殲脅從何爲汝能誅賊首惡不惟宥罪抑有厚賞以是賊內自相疑無復固志遂進兵逼之五戰五克乘勢欲殄滅之賊力不敵倉猝不知所爲于是大潰窮追數日斬峒英州境上獲三千餘人賊將大懼殺副首領李念九降餘黨悉平天子念功不忘盡復故官數宣宴勞問出內帑萬緡以賜紹熙改元轉武節大夫繼又轉武功大夫慶元元年被召至九江得旨奉祠以疾終于舊居年七十一子拱忠訓郎沿海制置司水軍統領梓護聖馬軍副使權保義檜進義副尉樾承節郎樾柄俱進義副尉杓承節郎

繫齊馮集

公行狀

四明談助

卷二十

二十三

馮氏得趣樓

馮統制居明之西湖榜其樓曰得趣軒曰愛日有泉石花竹之勝然地不越數畝闔門千指田止二頃殆無以贍或勸以增則曰匈奴未滅何以家爲襟抱曠夷不設防畛賢士大夫多稱述之

繫齊集

萬金樓

在湖上宋時馮氏建以施藥

延祐志

四休居士周鏢詩

幾年江上夢黃鶴意悠悠百尺獨臨水萬金難買秋杵聲喧藥市闌影侵漁舟應有湖中客分身向此遊

湖語高麗之使館宋人貢道之所資也

樓楚公所建後爲史氏寶奎精舍

陽

源之義烈宋忠臣袁公祠在湖心寺日本宣慰之凶終王積翁論日本而死詔卽其行營在

湖西者祠祀雖不同亦宋元史事所當知也馮氏萬金之樓

則義施也馮氏萬金施藥四休居士有詩翠桷畫簾東西相望如雲祁祁以

爲湖障下戶寒門蔑從依傍

豐尚書宅

宋月湖丈尺圖豐尚書宅凹處至觀音橋五十六丈八尺擬其地當在馮制使宅之北正對湖亭後空處豐氏舊宅在西郊傳俱列于舊宅下

柴巷徐氏

柴巷徐氏之先爲宋靖康之亂自吉州遷臨安茶樞公又自臨安徙鄮時在咸淳之季後自宋德祐歷元入明其間四世

四明談助

卷二十

二十四

祖景禮五世祖贈主事公茂良皆賢明能歷溯上世事得藉爲家乘因至九世而有處士鎮者修之啜墨亭集族譜序

甬上族望表宋末茶樞使硯之後自吉水來居西湖大理卿時進監軍鳳垣二望

鄞獻表稱柴巷徐氏族望表稱西湖徐氏詢之侍御後裔知其初自吉水來鄞硯之曾孫十二人明初爲方氏牽累播散避禍其一派遷居柴巷其一派名道中遷居南郭南郭一派有徙居北京者名應龍由舉人任陝西叅政徙居嘉興者名塏由舉人任江西安福知縣其居南郭者名夢科由恩貢任內閣中書明初遷居柴巷自刑部郎中祚始後因回祿遷王家墩在今五岳軒朱氏之西俗稱二馬房

空地中有一方池池中橫架石梁二道係張尚書故物後歸于徐氏 國初回祿後大理卿房下徙于青石橋侍御房下徙于湖橋監軍仍居秋官第

徐祚永樂庚子舉人刑部郎中 柴巷有秋官第門額尚在

徐謙宣德癸丑貢士鳳陽府定遠縣知縣

徐璉成化甲辰貢士江西會昌教諭子鏗由薦辟任陝西同知

徐時進萬歷乙未進士大理卿祖西石先生瀚父贈公有悅傳俱見青石橋第其後人徙居韓嶺

徐之垣天啓乙丑進士提學 傳見湖橋新第

徐之鶴崇禎壬午舉人知縣

四明談助 卷二十

二十五

徐鳳垣明季江上監軍 傳見後 孫世泰仁和廩生以祖與

汪魏美瀕交契冒其姓中康熙丁酉舉人後復姓就山西書院卒于館子敦仁少攻舉業不售兼習堪輿家書晚以地理爲業 汪孝廉瀕明季高士傳見南雷文定

監軍徐霜臯先生鳳垣

字掖青號霜臯幼挺秀長嗜羣籍爲文沉博絕麗一本于經史試諸生每冠軍與華吉甫王石鴈林霞舉諸人爲鶴山七子之會及諸人半以國事死復與萬履安高旦中李杲堂諸人爲寒松齋六子之會爲人和平樂易而苦節自矢自同志往還外不妄出門高隱學嘗曰四十年以來能依然處子之耿介者掖青與霞舉耳以貧故出遊四方卒

年七十有一著有負薪集續者舊傳

又徐氏附

甬上族望表遜國徐氏知鳳陽府安一望

知鳳陽府徐安洪武中由人才薦歷官濟南知府調鳳陽建文四年靖難兵由揚州犯南京燕王微服問道從靈壁出鳳陽安諜知之拆浮橋去舟楫以守王得一漁舟以濟及正大統放歸田里踰年詔舉遺佚復任鳳陽居數載諸戚里奏安不體朝廷親親之義偏護小民奪還莊業上曰我昔到鳳陽安尚拆橋况若等乎由是謫戍雲南遇赦歸田角巾野服逍

遙物表嘉靖志

徐御史第

四明談助

卷二十

二十六

徐御史之垣之後自王家墩遷居于湖橋頭門臨湖橋大街西通館驛橋東近均奢橋本係聞氏別第歸于徐氏考聞氏之先實爲余布政第今均奢橋賣酒家布政後裔也尚有故牒留存

徐御史之垣

字維翰號心韋大理卿時進之從子天啓五年進士授江西永豐知縣俗淳事簡每循行阡陌老稚邀入其室或逾數日始歸調吉水縣永豐民詣巡按請留不可輒擁歸縣環守不得行數日乃微服去吉水爲鄒公元標故里鄒公沒爲營身後事且爲立祠丁艱起補松溪擢檢察御史侍郎陳子壯以爭宗室改官事下獄公疏救之留中不下出

按湖廣見惡于閣臣溫體仁遂引疾歸及體仁罷以原官起召對平臺稱旨命按江北歲大侵發贖緩以賑作大厰收遺孩養之全活甚衆改應天提學御史陞太僕少卿國難後削髮爲頭陀終蠶齏集墓志傳互見碧溪別墅下子天鈺字亦沆有文名性恭謹儉恪無紈袴習見曹志附傳曾孫東康熙甲午舉人忠州知州五世孫錫壺嘉慶戊寅恩貢著悔廬詩文鈔六世孫汝枚嘉慶己卯歲貢著樹齋詩稿二阮聯居日以家學交勉其德業未可量也

尊志堂

亦沆先生于宅後園內構屋五楹爲奉祀外家之所顏曰尊志近見湛園未定稿中有慈谿節婦葉氏傳載亦沆先生德配李氏之孝并先生之奉養外母至今祭奠車廐墳墓并歲時設祀別室不衰湛園所稱別室卽宅後之尊志堂也

陳觀察第

嘉靖壬戌進士陳大章歷官閩省僉事傳見西郭陳家衙舊第下別有第在月湖之東諸生城字懷寧學林字聖水其後裔也

大歡喜庵

明萬歷三十五年里人大廷尉徐時進同僧宏祥建郡侯吳文企達部立石聞志庵臨大湖綠水紅牆晴光四照徐氏宗祠在其右祠內有古銀杏一株隔湖望之影射澄波森森特立

百年喬木僅見于斯道光二年舊宇重新以公費不足裔孫
在國獨助千餘金落成其事

湖東惠井

在歡喜菴側俗名沙井明嘉靖二年徐翁古心擇水涯潔地
鑿井以利人趙州判官梅墟陸金爲記載敬止錄

徐古心名鎧其元孫之垣之鶴鳳垣又一派居頓鑿最盛古
心孝友之行載沈延嘉廸吉錄中

陳太史宅

縣治西南後所營太史文宗陳東所居

聞志

甬上族望表西湖陳氏自後衙來河南提學副使東一望

陳太史后岡先生東

四明談助

卷二十

二十八

字約之生而聰慧絕倫好讀古書會稽侍郎董玘官翰林
時聞東才召視之垂髻而前試詞賦立就遂字以女攜至
京文譽益起中嘉靖八年進士授禮部主事遷員外郎改
編修公出張璫霍韜門以不肯親附爲所惡出爲湖廣僉
事分巡辰沅政治有聲改河南提學副使公故有嘔血疾
會科試期迫試八郡之士三月而畢疾增劇竟不起年僅
三十有三董亦能詩未幾亦卒公竟無後稿多散逸今所

傳后岡集僅十之一二云

詳見明史
文苑傳

崔侍郎銑飲量洪無可敵每酣輒歌劉伶能飲幾杯酒也
留名姓在人間陳約之東其同年董侍郎玘壻也少于崔
三十一歲視學河南崔業六十餘矣約之雅知量不敵恃

其少壯值崔病初起卽往按部安陽謁之崔與轟飲至夜分約之大醉跌宕不能支崔謂其從者曰彼且乘我瑕而鬪我耶復舉十餘白乃別陳遂病至咯血不起

玉堂叢話

陳孝子洪憲

字紹昌河南提學副使束之從孫年十六而孤家貧棄舉子業設廛以養其母母范性方嚴又善病公與妻朝夕左右侍食食已撫摩抑搔命之去然後退有不當意夫婦長跪牀下俟色解乃起生平敦信義重然諾進止皆有常度每以己未讀書見章縫士尤加敬愛有不給者多助之人

推爲隱德君子

聞志孝友傳

封庶常陳府君文奐

四明談助

卷二十

二十九

字伯美號桓墅正嘉間后岡先生起海島數傳以後猶傳家法后岡兄弟三人長后峯模中書舍人次后湖柬諸生后岡束其季也後湖生懷懷生洪憲洪憲生府君三世一丁兢兢以儒術廉恥高其門戶府君少習時文應科場無何失父柴水交侵又居燬于火憊心罷精磨以歲月儼然堂構歌哭有所已而其子錫嘏學成里中以爲大師府君始稍遂里社節臘之歡逮錫嘏舉進士官翰林府君謂曰吾祖后岡之爲太史于今一百四十八年汝復爲太史則續吾祖矣汝其勉之又三年而孫汝咸舉孝廉隨計偕府君就養京師瞻眺 宮闕徘徊玉堂覽帝城之法物接元老之琴樽屬 天子好文海內能文之士輻湊闕下會府

君七旬大誕篇什投贈充牣而天章下賁亦當其時錫

嘏請假送親歸鄉里榮之

南雷文定墓志

陳翰林錫嘏

字介眉號怡庭陳氏其先自青州徙鄞之後衢村又自後
衢徙郡城之月湖明初有名完中者生廣東市舶司提舉
璩璩生鑰鑰生贈朝列大夫濂卿濂卿三子府學諸生東
其次也東生懷懷生洪憲洪憲生文奐封翰林院庶吉士
君之父也君生而夙慧酷類其先世后岡方入小學讀孟
子至百里奚不諫輒作論非之康熙乙卯舉榜首明年登
進士改庶吉士兩考館元授編修奉命纂修皇輿表鑑
古輯覽二書書成進呈會講官員缺引見詹翰諸臣獨命

四明談助

卷二十

三十

至前細詢履歷奏對良久舉朝以君之蒙眷于上也咸
屬目之是時封翁文奐年已七十功名之志銷于愛日遂
告假送親歸先是甬上有講經之會君與其友陳赤衷等
數十人盡發郡中經學之書穿求厓穴齷齪如也自君出
而諸子亦散至是復集甬上多志行之士由此會爲之砥
礪耳君生平從事于格物致知之學于人情事勢物理上
工夫不敢放過至爲詞臣時公堂館課私室橫經書筒客
席屏當率至雞鳴不言勞瘁卽病中猶隱几危坐不釋丹
鉛苟一事一物精神之不到則此心危殆不能自安几君
之所以病病之所以不起者雖其天命亦其爲學有以致
之也卒年五十有四著有兼山堂集子汝咸

南雷文定墓志

陳大理汝咸

字莘學別字悔廬翰林錫嘏子也翰林于梨洲爲高弟大理少隨其父講學于證人社中目無流視耳無妄聽顧未嘗以道學自名康熙三十年成進士選庶吉士座主李安溪相國光地方以講學招徠後進或邀之同往大理謝不預散館改漳浦知縣俗好訟胥吏能以一訟破中人產大理下車後興利除弊商民之困皆爲一蘓漳故有黃公石齋明誠書院爲浮屠所據理而出之贍以田兼葺其遺書以示學者鄞故大學士錢忠介公墓在古田縣黃蘗山爲修埏道而清其界任漳浦更一紀尚未調蓋大理以講學不甚當于安溪旣無相門之授而選郎索賄又不可得遂共

厄之會南靖多盜而大理在漳浦令各鄉練鄉兵有賊黨數百伏邑之七里岡發鄉兵擊走之復聚于平和山因誘其黨林大札令擒賊魁曾睦以獻賊始解散又以計擒海中大盜徐容詳鞫之則知海中尚有六頭目且因供詞併得勦撫機宜申請招撫果降其四大吏奇其才遂調南靖縣漳民擁輿遮道不得前乃夜半微服去其治南靖如治漳浦未幾擢刑部主事遷廣西道御史疏言臺灣事宜已聞海賊燒汛船特具海防二疏疏上 溫旨慰勞五十年海賊陳尚義乞降卽徐容所供六頭目之一也前招撫時獨尚義不至因具劄謂當因其來而亟許之自請行且薦福建舉人蔡文同往招納陞辭 聖祖面諭近御之臣

不可蹈險但令蔡文入海爾駐遼左以待蔡文果撫納尚
義并餘黨十餘年巨患悉平復命擢通政司參議尋命使
湖廣事竣晉大理少卿會陝西甘屬報荒復奉使出大理
之爲學以萬物一體爲心而隨事周詳以求其中之所安
顧素病喘洩不堪任勞瘁乃連年萬里圖報答不肯稍自
暇逸其西行也 聖祖謂曰窮邊恐不得食彼所出肉菘
蓉土參朕亦曾嘗之頗美可啖也大理頓首謝入境見饑
民載道卽不御酒肉山路仄則下馬步行嘗一日踰九嶺
至平涼急發所貯粟賑之沿途撫慰饑民流涕沾襟甫抵
固原疾動不以爲意猶日馳百里凡五日而卒其地曰海
喇都棺衾皆率畧饑民聚而哭之 聖祖方欲用爲甘撫

四明談助

卷二十

三十二

而大理卒矣大理之訃至閩漳浦農商置祀田以奉公焉
大理家庭之孝謹里黨之任卹均無間言而所以待其從
弟汝登尤篤約以官成之後置宅合居汝登或介紹後輩
以見公公推弟之所愛以愛之訖今二十餘年汝登亦老
矣語及公未嘗不掩面而泣也所著有心齋集結埼亭子
集墓碑本醇大理之訃聞 聖祖憫之蔭其子入監讀書本醇亦
謹飭能守其家法孫熙綱字廷振少有文名乾隆辛卯舉
人考取國子監學正未補官卒有筠碧軒詩草錢志

陳南臯先生汝登

字山學其先世出自后岡先生南臯爲太史怡庭之從子
大理心齋之從弟生而爲怡庭所愛故心齋待之如同產

心齋之貴也力踐古人大功同財之義一切恣南臯所用而南臯篤于友朋之誼見有急者傾筐倒屣以濟之及心齋卒南臯驟困乏故人疇昔有賴以事育者至是卽宦達任其三旬九食漠然如路人而南臯亦未嘗形之詞色也自是日益老益貧卽欲謀之有力者以濟其窘然世路局促不能盡應也著有證人講義竹湖日知錄二山老人集等書

結埼亭集墓版

西湖林氏

甬上族望表西湖林氏其出本微行人司行人必達一望林侍御必達

字非聞一字不巖林爲福建莆田巨族有名眞者官明州

四明談助

卷二十

三十三

錄事參軍遂家于鄞再傳良良生廷道卽太翁也先生年二十九舉崇禎癸未進士官行人不一歲而京城陷南都有貴州主試之命以馬阮用事罷不赴未幾南都失守魯王監國乃就職越中進御史命輔都督陳謙賀唐王于延平唐王者監國姪也改元隆武使大學士中藻頒詔浙江以給事熊汝霖不聽監國受約束遷怒謙謙死并以公下獄旣而釋之仍授行人分校試事尋還其御史提督福京學政丙戌方按汀州豫親王統皇師破仙霞關數百艘乘流薄城下延平宵遁走臺灣郡邑望風降附豫親王以便宜令公仍舊任公微服遁追駕從亡閏六月朔浙東兵亦潰監國航海先生出臺灣迎之不遇遂歸妻妾子孫無

一存者鯉庭相對惟太翁與先生而已乙巳浙督趙公廷
臣薦之復膺 召命固辭不出時甬上逸老以林都御史
繭菴葛祭酒確菴與公並稱三逸繭菴年九十一而卒公
年九十三而卒至是故國之遺老盡矣晚年困悴日甚日
手一編所居不蔽風雨處之怡然臨終賦絕命詞六首

續耆

舊傳參春
草堂集

楊指揮衙

衛後所世百戶楊興北直密雲縣人父大洪武三十四年代
大寧前衛總旗張得二姓名隨百戶李剪兒從靖難有功
升大寧實受百戶取得二任事永樂二年查得二不係原
征人數取大授此職興兄榮以長男襲榮無子永樂十六

四明談助

卷二十

三十四

年興以弟襲調寧波衛後所百戶傳子貴三

衛後所世千戶楊貴三正統十四年調處州勦寇景泰元年
調勦福建延平沙龍等縣賊勘功升本所世副千戶傳子
王玉傳成成傳董董傳斌

指揮僉事楊斌嘉靖己未科中武舉第一授江西都司指揮

僉事

有武狀元坊在
紫薇街今尚存

傳學時

天麒

天麟

以上俱見
敬止錄

後所營房蕭氏

敬止錄所採崇禎間承襲故冊因卷葉斷爛不全此蕭氏不
在內今從其先世遺像序中錄出

昭信校尉蕭任舊隸豫章古臨江郡巴邱邑安國鄉人也同

伊叔祖鎖兒從軍歷奏大勲于洪武三十三年征進白溝

河并濟南等處大捷後又攻克滄州大軍全勝隨征進夾河藁城等處大戰全勝叙功授昭信校尉傳子成

衛後所世百戶蕭成洪武三十五年以父任功優給成于錦衣衛中左所永樂八年襲中山護衛十五年欽調羽林前衛十六年又調寧波衛後所百戎宰因世其官家于斯遂聚族焉而後所營房之名于是著成傳鏞鏞傳源源傳孟銑代襲祖勳光大厥家

蕭廣文鳳來萬歷四十四年貢士官訓導

鄞獻表

父純幼時附

學于比隣陳太史家適少司馬黃致齋在座聞書聲迥異試以七藝立就遂以女妻之生五子四子俱列鄉校其一卽鳳來也兩官廣文疏明道學爲海內宗仰

蕭氏遺像序

四明談助

卷二十

三十五

王府教授蕭驄字漢雄別號青臺昭信任九世孫也先代世爲衛後所百戶有承襲印照藏于家後以文學相傳宏光元年漢雄爲上雒王府教授聘書亦藏于家能詩古文以時值鼎革各家爲兵馬雜遯不便供奉祖先大像姪濬爲總繪先世遺容以奉祀正值教授北還見而喜喜而序之至今蕭氏子孫猶得知其大畧惟賴此一序云

蕭文學人龍字在田又號梁裔王府教授驄之長子康熙間補弟子員能書尤工小楷又能詩見續耆舊集曾孫光第字振聲號東圃少攻舉業不售隱于卜能詩其皎游集已有刊本

史忠宣宅

在月湖北史忠宣彌堅之宅宋時賜第故稱後府嘉靖志
資政殿學士史忠宣彌堅

字固叔忠定之幼子少警敏端靜忠定奇之以軍器監尹
臨安韓侂胄敗兄彌遠入相以嫌出爲潭州湖南安撫使
極爲真文定德秀所稱紀其政績以兄久在相位數勸歸
不聽遂食祠祿于家凡十六年加資政殿學士寧宗御書
滄洲二字賜之卒諡忠宣詳延祐志

史敷文賓之

賓之爲固叔小子方以敷文待制轉運湖北避從兄嵩之
爲相未老遽乞休歸老滄洲是猶其父固叔之不附同叔

也點琦亭集

四明談助 卷二十

三十六

史忠宣尚郡主

史忠定王淳熙中召赴德壽慶壽班孝宗曲宴問曰太傅
幼子今何姻忠定謝不敢孝宗曰吾爲太傅成之時崇獻
靖王伯圭女方笄卽封新安郡主以姝之卽彌堅也壯歲
尹臨安帥湖南有異政以兄爲相久不復肯仕以資政殿
學士封奉化郡開國公致仕清容居士集

忠宣諫兄辭相位

史忠宣彌堅居東湖滄洲十有四年作書諫兄忠獻辭相
位不輟歲賜生日器幣辭一再始受後數年不復受鄭忠
定丞相忠宣塾師也子敷文受學焉其舊第前爲舊學壽
皇書後爲授經鄭相書清容居士集

高麗使館

樓楚公昇建後爲史氏寶奎精舍結埼亭集宋燕寧間中書省劄子已降勅旨奉使高麗船第一隻賜號凌虛致遠安濟神舟第二隻賜號靈飛順濟神舟令御書院如法書寫急遞至明州交割及令本州製造牌額安排所有勅牒令安燾等收掌

玉照新志

高麗通使始末

此宋市舶務杭寧並設天聖四年十二月明州言日本太宰遣人來貢獻無表文却之福建路轉運使羅拯言據泉州人王眞狀嘗以商至高麗高麗舍之禮賓省見其情意欣慕聖化兼云祖禰以來貢奉朝廷天聖遣使之後久違述職便欲遣人與眞同至恐非儀例未敢發遣兼得禮賓省文字具在乞詳酌行詔諭眞許之自是王徽王運王熙修職貢尤謹朝廷遣使亦密往來率道于明明州始困供頓

按宋王闕之澠水燕談作王慎且云將由四明登岸比至爲海水飄至通州謝太守云望斗柄以乘槎初離下國指桃源而迷路誤到仙鄉使臣御事官侍郎金第與行朴寅亮詩尤精如門前客棹洪濤急竹下僧棋白日閒句人俱稱之

元祐二年高麗僧義天至明州自言棄王位出家上疏乞徧歷叢林傳法受道有詔朝奉郎楊傑館伴所至吳中諸刹迎餞如王臣禮惟金山僧了元床坐受其大展謂楊曰義天亦

貴國僧耳叢林規繩不可易朝廷聞之以了元知大體蘇軾有送楊傑詩云三韓王子西求法鑿齒彌天兩勅敵過江風急浪如山寄語舟人好看客韓有三種馬韓辰韓弁韓皆高麗也

南渡時高麗進陰陽柏二株僅二尺許每歲左花則右實右花則左實高宗以賜王絢絢種之永懷寺殿庭左右後高與殿齊

中國賈人至高麗風候逆或二三歲不可返因室焉返則禁止其妻若子不得從再至有室如初明州與其禮賓省以文牒相酬酢皆賈舶通之

前至元二十九年六月日本來互市初日本舟至四明求互

四明談助

卷二十

三十八

市舟中甲仗皆具是年冬恐有異圖詔立都元帥府以防海道

至大二年島夷以土物互市郡境吏卒侵漁之不堪以忿持所賚流黃等藥火城中官府故家民居幾盡見虞文靖元妙志記凡官署寺觀所云至大二年火者皆是也

至治二年復置市舶提舉司于泉州慶元廣東三路聽海商貿易歸徵其稅特禁子女金銀絲綿下番餘並無阻以上俱敬止錄

寶奎廟

縣治西南一里平橋南考市舶志云樓异剏高麗使行館今寶奎精舍卽其地則知寶奎先以徽宗批允樓异廢廣德湖田宸翰得名後因館中土地神立廟今里中題爲奎宿之神

是以奎畫相尊也

聞志

月湖丈尺圖史魏公府後有御書閣北

近舩坊

寶奎廟碑記

結埼亭集

寶奎廟在平橋之南嘉靖志云寶慶志但載寶奎二字于平橋之南不言有廟又攷其記市舶云樓異倡高麗使館今寶奎精舍卽其地則寶奎先以宸翰得名後卽祀其神以爲廟由志所言似高麗使館嘗有宸翰以愚攷之殊不然寶奎精舍蓋史氏藏御書之閣史氏自忠定築別業于湖南之竹洲光宗在東宮嘗書四明洞天四大字賜之而前此高宗孝宗所賜御書亦多忠定之眞隱觀雖在竹洲其實跨湖而東至今所稱花果園皆洞天之所包也迤邐自均奢橋之北直接

四明談助

卷二十

三十九

平橋所謂世祿坊者乃其賜第忠定卒是宅歸于長孫子仁卽朴齋侍郎子也不義其叔忠獻所爲退居湖上築園湖北之碧沚寧宗御書碧沚二字賜之亦跨湖與閣通構精舍于其下延楊袁二先生講學焉于前此樓氏高麗使館無預也既有是閣遂以寶奎爲里名而不言廟蓋是時未成廟也諸史之別宅月湖者袞繡坊最在湖之西北世祿坊在湖之東北竹洲在南報恩寺在西花果園在東碧沚在北石窻居又在碧沚西北十洲三島半屬平泉其盛如此今皆廢矣袞繡坊之橋明時撤以爲保豐硯石世祿坊歸于方國珍爲花廳後歸張布政竹洲之觀改祀晏公後爲陸康僖祠尋歸吾家報恩寺爲廣盈倉碧沚菴歸范侍郎獨是廟及花果園廟尚

存夫宸翰何神之有而梓潼之祀自袁學士清容始其盛也
自袁尚寶靜思始今且浸淫遍于天下或以爲北斗之六星
或以爲張仲或又以爲卽蜀中之張僊而是廟則因寶奎而
附會之幸文獻不至無徵爲詳其始末如此

寶奎里施氏

甬上族望表寶奎里施氏自管江來都督僉事翰殉難諸生
邦焮二望

施氏清風閣

施二華都督自雲南神機營歸卽所居之旁營別墅建清風
閣種竹萬竿逍遙憇息

聞志

施通判承芳

四明談助

卷二十

四十

號賓宇本勳門後以博學善說經教授里中一時名士多
出其門由明經授石門訓導歷遷貴陽府通判卒于官弟
翰以武進士官神機營都督亦有文名里中稱爲文武世

家者舊傳

施都督翰

字季鷹號二華自幼倜儻有大志家貧力學博通經史嘗
汎海外泊舟窮島獨步窅壑間見一物大倍于牛臥不見
首青蠅蔽空鯉氣逼人蓋龍也聞志壯遊長安爲寧遠伯李
成梁客更習騎射中武進士授萬安守脩時鄒公元標以
直言被放講學里中公至執贄行弟子禮士論俱推之擢
雲南叅將善控御苗蠻境內肅然黔國沐公廳事前有滇

茶一株橫覆二廳值花大開沐公置酒大召文武將吏燕集賦詩復請公爲題一額公卽席大書一片紅雲四字書法斐豐沐公命酒爲壽四座盡傾擢領神機營都督僉事引疾歸公家居垂二十年于宅後更起竹中精舍栖息其中山人梵客時相過從每上客至郡必先造其園亭公作倉卒主人布席奏樂童僕無聲其風流若此卒年八十一所著清風閣集行于世耆舊傳

施公子邦焮 一作宗焮

字仲茂明寧波衛指揮數傳至都督僉事翰總戎開府施氏始大卽公之父也都督雖以甲冑起家而有儒將風詩筆書法皆絕工公子承家學文事武備兼習之旣補諸生

四明談助

卷二十

四十一

思以科名自見故于應襲世爵懸而未赴國難旣作思執干戈以衛社稷錢忠介公師起毀家輸餉忠介言之監國許以左班從優換授部曹以病未上而江上破益鬱鬱不得志會華職方夏謀引海上師取浙東公子知之謂王評事家勤曰吾招集城東豪傑幾三千人管江諸杜爲之魁其餉吾一人可任以之輔職方可乎評事大喜乃共議以職方主中甄評事與公子主東甄慈谿馮氏主西甄先日爲夫已氏所發城中大索公子時在管江評事來奔偵事者亦至公子梟其首以兵拒命管江彈丸地然山谷巖險遂得負嵎三日力竭公子拔先世所遺佩刀自刎曰吾不負此刀也公子死而無子都督遂絕慈谿鄭副使平子

都督壻也密遣人取其尸葬之都督大墓旁命子孫世祀之副使之子高州太守梁太守子貢生性至今勿替

結埼亭集

墓表

陳孝婦救翁被災

孝婦爲諸生陳運字佩園之妻賃居寶奎廟巷嘉慶辛未佩園館于外一日近隣失火延燒孝婦急救其翁從烟焰中負之而出復救其幼女火倍烈母子俱死時學使者周公兆基按部至寧聞其事將奏請旌表佩園寒士以無力出費遂止今已旌表入祠

戴學博舊居

戴學博淦字豐城別署蕙江祖居奉化遷于湖上寶奎里能

四明談助

卷二十

四十二

文有幹才乾隆壬午科副貢需次于京得泰順訓導以缺劣避之後十餘年復選泰順因知數由前定不可強也居久之以母老告終養歸里色養備至母九十餘卒後數年學博亦卒子經太學生

維舟埠

北宋時城中維舟之地在紅蓮閣下南宋始移平橋

湖語註

月

湖丈尺圖云船坊取西至民屋後二十二丈七尺五寸

時亭

在平橋右寶祐五年刺史吳潛築梅應發爲記

開慶續志

水則

淳祐二年夏淫雨不止兩月人人皆憂無可救療郡守陳塏

謂旱澇豐歉在天者固不可必若人事所當修豈容不盡其力遂置平水尺朝夕度水增減以爲啓閉大槩郡城河濱之水常以三尺爲平餘可類推過平以上則當洩郡守一聞雨驟水泛不待都保縣道申到放閘之人已遣行矣防患未然所宜書以示後

錄寶慶志語

寶祐間丞相吳潛來治郡三年凡硤

閘堰埭皆爲修改又于郡城平橋南立水則書平字于石視字之出沒爲啓閉澹洩之準潛自爲之記

開慶續志

潛旣爲水則

且空其旁地使守令車馬過輒見之卽時稽察水候可否明嘉靖十三年知府鄭威建社學于空所失初意矣後百有餘年社學久廢不存而水則盡埋入瓦礫中

國朝順治七年

海道王爾祿開掘乃克復見

李志

寶慶志有水則議見錢志吳

四明談助

卷二十

四十三

記亦載聞錢二志中

湖語于是水則是平時亭是崇刻篙志步

見水則碑

昕夕之車騎

觸目儆心或蓄或洩斟酌從容是以湖之水勿匱湖之利長充政成民樂半黑半絲之髮憂晴憂雨之心觴咏其中

卽吳公湖

上詩甘棠之蔽芾其誰與同春猿秋鶴宜禋祀之攸宗

乾隆五十年間淘河至平橋下掘出如臂大小餅無數不解其故近年觀察陳公浚河以平橋爲水道要口加倍開闊北岸多廛舍不動南岸開至小街旁有老礮仍在喜出望外水則平字于瓦礫中尋出仍立原處街西向有廟以祀吳公今欲顯露水則于街東別買民地建廟觀察陳中孚爲記諸生張蕙書丹上石陳公去後卽于廟左另建一

間祀之寶奎里卽昔之菊花洲止于平橋河自竹嶼月島
而至菊花洲東岸之三址也此爲府治第三條朝沙